

## JESUCRISTO ORETAGANODI NAIMIE RAFUE LLOCANA UILLA RAFUE

### *Jesús Jusiñamui Joreño billena llua rafue*

<sup>1</sup> Teofilo, o dine, ¿nigacino? ¿Nie isoidio? Omo jiaie rabe birui dane oretaiacadícue. Lucadícue. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue. <sup>2</sup> Monamo naimiena Jusiñamui nia uiñe-nia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci. <sup>3</sup> Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaiño cuarenta digarui naimacimo baireuide. Naimacina Jusiñamui díbeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

<sup>4</sup> Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai llotícue. Naiena omoi feiñollena, Jerusalémo nia fiebi.

<sup>5</sup> Naimie rafuena comini ñnuamona, Juan Bautista micori jinui diga bautizade; iadedi cue rafuena omoi ñnuamona, nano nigarui illanona, cue Moo ie Joreñona feiñoitomoi —raite.

### *Monamo Jesús jailla rafue*

<sup>6</sup> Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judúuai cominina jai sedaitio, David micori cai usumatiai micoriai jaie sedaja isoi?

<sup>7</sup> Naimie uai ote:

—Naie rafue suille facaiseconi jaca uiñoñeitomoí. Naimie siñona illamona, dama cue Moo naie rafue suilliruina uiñote; <sup>8</sup> iadedi cue Moo ie Joreñona omoi feiñua mei, siño uai omoímo iite. Ie jira Jerusalémo cuena lloitoí. Judeamo, Samariamo, ua nana eniruemo ite nairaimo lloitoí —raite.

<sup>9</sup> Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede. <sup>10</sup> Monamo nia eruaidemo, ieconi naimaci dine Jusiñamui jaienici, mena iima bairia isoi, bairediaimaiai. Naie iaimaiai iniroi userede. <sup>11</sup> Raitiaimaiai:

—Galileo imaci, ¿bue ñellena monamo eruaidomoi? Omoi motomona Jesús monamo jaillana jai ciodomoi. Naimie jai jailla isoi, dane abido ico biite —raitiaimaiai.

### *Matiana fetua rafue*

<sup>12</sup> Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci. <sup>13</sup> Rillano imaci cuartomo jaidimaci. A díbebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Diese nainomo itimaci. <sup>14</sup> Naimaci jitaillamona, Jusiñamuimo jállena, nagarui danomo ofidimaci. Jállena, jiaíno naimaci díga jiaí ofisoidimaci. Díga riñoniai jiaí ofisoidimaci. Jesús ei, María, jiaí ofisoide. Jesús amatiai jiaí ofisoidimaci.

<sup>15</sup> Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

<sup>16</sup>—Amatiai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacinodi cueda. Iena uiñoticaí. Judas micorina uiñoticaí. Naimie Jesúsna gaitadinona ifode. <sup>17</sup>Naimiedi da cai llofueoicaigano imie. Cai diga maijjuide. <sup>18</sup> Ie maraiñeno finoca rafuemonu ucubena feiñua mei, ie comeci iuaina meiduanona, naie ucubena oni judaíde. Judíuái illaicomini naie ucube diga eniruena íbadimaci. Nainomo Judas micori ie cimaio cuinajanona, ie abina dama meinete. Rifaiillamona, ana uaiillamona, ie jebegi boficaillamona, nana ie jebegi jino uaide. <sup>19</sup> Nana Jerusalémo itino iena fididimaci. Ie jira cai uaido naie enirue mamecireda Acéldama. Oni dobaíñuamona dirue toillanie. <sup>20</sup> Ero, Salmos rabenicomo Judas micorina íese David micori jaie cueda:

Naimie illano taino iite.

Buna jaca íemo íñeite.

Naimie maijille jiaimíemo iite.

Íese cueda. <sup>21-22</sup> Ie jira cai diga ítinomona damiena fetoiticaí. Cai Nama Jesús cai diga illa facaiseconi, nagarui diga íñiaí cai diga jaisoidimaci. Juan Bautista micori Jesúsna bautizaja facaisemona, Jesús monamo caimona jaillarui facaiseconi, naimaci cai diga jiaí ítimaci. Naimacimona damiena fetoiticaí, Jesús jilluana cai diga llollena. —Íese Pedro raite.

<sup>23</sup> Ie mei mena íimana fetodimaci. Damiedi José Barsabas. Jiaíci mamecí Justo. Jiaimiedi Matías. <sup>24</sup> Ie mei Jusiñamuimo jiidimaci:

—Nama, nana comini ímaci comeciaina uiñotío. ¿Nie íimana jítaidío? Caina uiñota. <sup>25</sup> Naimiedi Judas ífo meidoite. Jesús íe oretagamiena naimie jaillamona, cai diga maijjíte. Ie fiodaillamona Judas micori íe maijjiana

jai faimonocaide —jïdimaci. <sup>26</sup> Ie jira conima jabomaside, uïñollena bu ille. Matíamo baite. Iemei jiaie once diga oretagano isoi naimie ite.

## 2

### *Cristo oretagano Jusiñamui Joreña feiñua rafue*

<sup>1</sup> Pentecostés railla rafue irui ria, nana creyentiai diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. <sup>2</sup> Danomo ia, ebena illacinomona monamona riire aifi billa isoi buena cacadimaci. Nana jofomo itino naiena jiai cacadimaci. <sup>3</sup> Iena naimacimo bairede. Iena ciodimaci. Irai boua isoi eruaide. Nana naimacimo baite. <sup>4</sup> Iese Jusiñamui Joreña feiñotimaci. Nana naimaci comeciaina namatade. Iemei diga nairai uailaïdo ñaitimaci, Jusiñamui Joreño naimacina ñaitatajamona. Naimaci ñaia uailaina uïñoñedimaci.

<sup>5</sup> Naie facaiseconi Jerusalémo Jusiñamui rafuedo eo jaide judúuaidi itimaci. Diga nairaiaimona bitimaci. <sup>6</sup> Creyentiai ñaiana naimaci fidiano, ailluena comini jino tainomo ofidimaci. Nagamiiaidi ie nairai uaina cacade. Ie jira jacinaitimaci. <sup>7</sup> Eo rajicaïdimaci. Coninimo jicanotimaci:

—¿Buta ñaite? Nana Galileos imaci. <sup>8</sup> ¿Niese naimacina cacadicaï? Cai uaido dajerie ñaiana cacadicaï —raitimaci. <sup>9</sup> Diga comini imiaï itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, <sup>10</sup> Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jiai itimaci. <sup>11</sup> Judúuai itimaci. Judúuaiñedino jiai itimaci. Judúuai isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci. <sup>12</sup> Nana eo rajjicaidimaci. Danirie jicanododimaci:

—¿Bue ite?

<sup>13</sup> Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

<sup>14</sup> Ie facaise ie once nabaiñiai naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue llamo cacarei. Naie rafuena lloiticue. <sup>15</sup> Omoí comeciaina omoí facaja isoi, jifaiñedicaí. Jitoma nia furi daidemo, bu jaca jifairainina. <sup>16</sup> Joel micori bie rafuena jaie llote. Joel micori Jusiñamui rafuena lloraíma. Naimie jaie lloga rafue birui caimo jai suide. <sup>17</sup> Llote:

Jusiñamui caimo llote: “Jiairuido bie rafue suite.

Cue Joreñaona diga cominimo fecajiticue.

Iedo omoí uruiai cue lluaña lloitimaci.

Iemona omoí coniruiaina nicairitaiticue.

Iemona omoí einamacina jiai nicairitaiticue.

<sup>18</sup> Ua nana cuena sedadinomo cue Joreñaona fecajiticue.

Naimaci cue lluaña lloitimaci.

<sup>19</sup> Monamo eo jacirede rafuena ico suiñotaiticue.

Eniruemo eo jacirede rafuena ico jiai suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

<sup>20</sup> Jitoma lligaiñoñeite. Fivui diruena eruaité.

Nana bie suite, Cristo billa facaise nia iñenia.

Naie facaise diga jacirede rafue suite;

<sup>21</sup> iadedi birui cuemo bu jicaia, ie jeacinomona naimiena jillotaiticue” Jusiñamui llote.

Ie Joreño caimo birui illamona, Joel micori llogacino jai suide.

<sup>22</sup> 'Caimaci, bie uaina omoi cacarei. Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi. <sup>23</sup> Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúsna coraitatomoi. Jusiñamuina iñoñedinona naimiena meinetadomoi; <sup>24</sup> iadedi fiodaillamona naimiena Jusiñamui jillotajano, llegei ie cacajamona naimie jillobide. Naimie fiodaite; iadedi fiodaillamona nainomo iñoñede. <sup>25</sup> David micori naimiena jaie llote: Jusiñamui cue diga jaca illana uiñoticue.

Cue ecimo naimie ite, cue comecina ocuiñotallena.

<sup>26</sup> Ie jira cue comeci caimare ite. Eo iobidicue.

Cue marena illemo jai jiai ocuiridicue,

<sup>27</sup> raiafomo cue joreñona naimie fañonocaiñena jira, ie mare Jito abi rifaillana naimie jitañena jira.

<sup>28</sup> Naimie cuena jilloitallena uiñoticue.

Cue diga naimie illa jira, cue comeci caimare iite.

<sup>29</sup> 'Caimaci, cai usuma David micorina marefodo ñaiticue. David micori ñaia, dama naimie facaina ñaiñede. Jesúsna ñaite. David micori jaie fiodaite. Raiafomo jonega. Naifo bene nia illamona, naimiedi Jesúsna ñaiana uiñoticaí. <sup>30</sup> Ie ia David micori Jusiñamui rafuena llote. Naimie micoridi Jusiñamui naimiemo uanaicínona lluaana uiñote. Jaie Jusiñamui naimiemo llote: "O uruiaimona damie illaimana illanona, ie cominina sedajite" llote.

<sup>31</sup> Cristona ñaite. David micori nia suiñede rafuena llote. Naimie micori Cristo jilloillena llote: "Raiafo Jusiñamui fiodaillanomo Cristo Joreño fañonocaiñeite. Cristo abi rifañeite" llote. <sup>32</sup> Jesúsna ñaite. Jusiñamui Jesúsna jai jillotate. Nana cai iena ciodicaí. Ie jira iena lloticaí. <sup>33</sup> Ie ecimo Jesúsna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi.

<sup>34</sup> Naimie abi monamo jaiñena jira, David micori dama

naimie facaina ñaiñede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana rai.

<sup>35</sup> Ona ñinoñedinona o anamo itataitucue”

raite. David micori llua isoi, birui jai suide.

<sup>36</sup> Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judíuai comini naiena uiñuana jitaidicue.

<sup>37</sup> Pedro lluana cacajano, naimaci comeciáimo riire baite. Pedromo iena jicanotimaci. Ie nabaiñiaimo jiai jicanotimaci:

—Caimaci, o lluana jai cacadicaí. ¿Bue finoiticaí?

<sup>38</sup> Pedro uai ote:

—Omoi comeciáí iuaina meido. Iemei Jusiñamui omoimo ite jeacinuaina dotajite. Jesucristo facaina omoi bautizallomoi. Jusiñamui Joreñona jiai feiñoitomoi.

<sup>39</sup> Omoimo ie Joreño fecallena navui llote. Omoi uruiaimo jiai fecaite. Jiaie nairaiáí itinomo jiai fecaite. Ua nana Jusiñamui fetocanomo jiai fecaite.

<sup>40</sup> Diga uai naimacimo Pedro llote. Raite:

—Ailluena comini maraiñede rafuena birui finocana jaidimaci. Faifitimaci. Naimaci isoi jaiñeno; iadedi cue lluana omoi cacajamona, iena ñino.

<sup>41</sup> Diga comini ie lloga uaina feiñuano, bautizadimaci. Nairuido nibai tres mil comini creyentiaína jaidimaci.

<sup>42</sup> Cristo oretagano llofuiana fueuidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiiuidimaci.

*Cristona* ñinotino illa rafue

<sup>43</sup> Cristo oretaganodi diga siño rafuena finuamona, nana comini jacinaitimaci. <sup>44</sup> Nana creyentiaí damacina itimaci. Naimaci raruiáí coninimo fecauuidimaci.

<sup>45</sup> Dueredino ia, naimacina canollena, raruiáiredino

naimaci raruiaina vendedimaci. Iemei naie ucube dueredinomo fecadimaci. <sup>46</sup> Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiai sedauidimaci. Nainomo danomo guillanona, Jesús fiodaillana começuidimaci. Caimare imaci começiai illamona, caidiñeno guisoidimaci. <sup>47</sup> Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

### 3

#### *Jusiñamui jofomo Pedro llucino*

<sup>1</sup> Jusiñamui jofomo jiaa facaise Pedro iaïmaiai Juan diga jaide. Jitoma ana ia, comini jiiuidimaci. <sup>2</sup> Iaïmaiai jaillanomo jiaie comini tisitaitimiena atiana ciodiïaïmaiai. Tisitaitimiena naimie jaca jeiciga. Naimiena nagarui atiano, Jusiñamui jofo ie ebiredena railla nase fuemo rainauidimaci. Nainomo naimiena rainauidimaci, fo jaidinomona ucube jica-jicallena. <sup>3</sup> Iaïmaiai fo jaiacania, ucube jicallena, ie onolli ñuitade. <sup>4</sup> Iaïmaiai naimiemo eruaïllano, Pedro raite:

—Cocomo eruai.

<sup>5</sup> Ie jira iaïmaiaïmo eruaïde. Ra feiñoitena, ocianona sedade. <sup>6</sup> Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaiticue.

<sup>7</sup> Pedro naimie onollido llinuano, a naidanete. Ieconi naimie eillidi jillode. Ie taisicoñuai jiai jillode.

<sup>8</sup> Daiacaïllanona naidacaide. Macarïllanona, iaïmaiai diga fo jaide. Jusiñamuimo iobillacinona fecajano, daiacaïllanona macarite. <sup>9</sup> Nana comini naimie macarïllana cioidimaci. Naimie iobillacinona fecajana jiai cacadimaci. <sup>10</sup> Naimie nase fuemo ana raisoïlla jira,



naimiena uiñotimaci. Naimiemo jai suide rafuena eo rajjicaidimaci. <sup>11</sup> Naimiedi Pedro iaímaiaí Juan diga nia llinuano, naimaci dine Salomón micorí finotaga jofo abí ibirimo comíni aisidimaci. Rajjicaidimaci. <sup>12</sup> Iena ciuano, Pedro naimacina raite:

—Caimaci, ¿bue ñellena biemo rajjicaidomoi? ¿Bue ñellena caimo iese eruaidomoi? “Daimaiaí iaímaiaí uaido naimiena jilloitate” raillanona cocomo eruaidomoi. <sup>13</sup> Iena finoñedicoco; iadedi Jusiñamui iena finuano, ie Jito Jesúsna iobitade. Cai usumatiaí micoriaí, Abraham, Isaac, Jacob, ua nana cai usumatiaí micoriaí bie Jusiñamuina sedadimaci; iadedi Jesúsna birui fecadomoi, coraillena. Pilato naimiena jino marena oretaiacana jira, Pilato ecimo naimiena llogidotomoi. <sup>14</sup> Mareuidimiena jitaiñedomoi; iadedi come fatimiena cárcelmona jino billana jitaidomoi. Barrabás raillamiena jitaidomoi. <sup>15</sup> Jusiñamui díbeimo caina itatatimiena meinetomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco. <sup>16</sup> Tisitaitimie jilluana jai ciodomoi. Naimiena uiñotomoi. Jesúsna naimie íinua jira, Jesús naimiena mairitate. Naimiena raise jillotate. Iena jai ciodomoi.

<sup>17</sup> Caimaci, ero, omoi finoca rafuena abina uiñoñoeno finodomoi. Omoi illaicomíni jiaí daje isoi finodimaci. <sup>18</sup> Jaie Jusiñamuidi ie facaina llorainina jiaíruido suille rafuena llotatate. Naimacina Cristo llogi cacajana llotatate. Birui naie llogacino suide. <sup>19</sup> Omoi comeciaí uaillaí meido. Jusiñamui díbeimo omoi comeciaina meido. Iemei Jusiñamui omoi jeacinona dotaite. Iena jaca feitaite. <sup>20</sup> Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimiedi omoi jilloitaraima. <sup>21</sup> Jusiñamui facaina lloraini micoriaí jaie lloga rafue suille dinori monamo naimie fiebiite. Jaie Jusiñamuidi ie mare lloraini micoriaí uaido buena llote. <sup>22</sup> Moisés

micori raite: “Omoi cominimona naimie rafue lloraimana jaillena, cai Nama Jusiñamui cue isoi damiena fetoite. Nana naimie omoimo lluana cacarei. <sup>23</sup> Bie lloraimana bu cacarefiñenia, Jusiñamui naimiena duere finoite. Iemona faifite”. <sup>24</sup> Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci biena llotimaci. <sup>25</sup> Jusiñamuidi cai usumatiai micoriaimo rafuena llote; ia bie rafue birui omoimo jiai duide. Jusiñamui Abraham micorimo jaie llote: “Nana cominidi o uruai muidona caimare iitimaci”. <sup>26</sup> Ie rafue suiñollena, Jusiñamui ie Jitona omoi dine navui orede. Omoi caimare illena, nano omoi maraiñedicinona fainonocaitallena, omoi dine naimiena nano jai oretate.

## 4

*Cristo oretagamaiai* llaicomini motomo illa rafue

<sup>1</sup> Comini diga Pedro iaimaiai Juan diga ñaia facaise, Jusiñamui diga ñairainidi naie iaimaiai dine bitimaci. Jusiñamui jofona sedaraini illaïma diga, saduceuai railla comini diga jiai bitimaci. <sup>2</sup> Fiodaillamona Jesús jai jilluana llofuetiaimaiai. Cominina iaimaiai llofua jira, naie iaimaiai diga iciritimaci. <sup>3</sup> Iaimaiaina gaitajanona, jai navuilla jira, cárcelmo jonetimaci, ie jitiramo naie rafuena siadollena. <sup>4</sup> Iese suide; ia Pedro llogacinona cacadinomona ailluena comini naiena ñnotimaci. Cinco mil digamie creyentiaina jai itimaci.

<sup>5</sup> Icoiti Jerusalémo nana judúuai illaicomini siadollena ofidimaci. <sup>6</sup> Anás jiai bite. Naimiedi Jusiñamui diga nanoca ñairaima. Caifás bite. Juan bite. Alejandro jiai bite. Nana Jusiñamui diga nanoca ñairaima cominidi ofidimaci. <sup>7</sup> Naimaci motomo Pedro iaimaiai Juan diga atianona, iaimaiaimo jicanotimaci:

—¿Bu uai diga biena finodomico?

<sup>8</sup> Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloiticue. <sup>9</sup> Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi. <sup>10</sup> Jesucristo uai diga jillode. Omoi buena uiñuana, ua nana judfuai comini buena uiñuana jitaidicue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tisitaitimie jai benoconi naidaillana ciodomoi. <sup>11</sup> Omoi jofo finoraini isoidomoi. Omoi jitaiñede noficidi jiaie nofici baifemo jai jaide. Jesúdi naie nofici isoide. Naimie rafuena omoi jitaiñena jira, naimiena meinetomoi. <sup>12</sup> Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —llote.

<sup>13</sup> Jaciruiñeno marefodo llofuetiiaimaiai. Nainomo itino iena cacajano, comecina facadimaci: “Abina uiñoñediiaimaiai. Jamai bue isoidiaimaiai”. Ie jira rajicaidimaci; iadedi Jesús llofueoicaigaiaimaiaina illana uiñotimaci. <sup>14</sup> Jilloitagamie iaimaiai diga naidaillana cioidimaci. Ie jira naimaci uai iñede. <sup>15</sup> Naie rafuena siadollena, naie illaicomini iaimaiaina bai oredimaci. <sup>16</sup> Coninimo jicanotimaci:

—¿Niese naie iaimaiaina nibaiticai? Nana Jerusalémo itino iaimaiai siño rafuena finuana jai fididimaci. Iena janonidicai. <sup>17</sup> Jiaie comini iena fidii raillano, Jesús rafuena iaimaiai llofuiana rairuiticai.

<sup>18</sup> Ie mei iaimaiaina naimaci dine dane uaidotimaci. Iaimaiaimo Jesús rafuena llofueñellena riire llotimaci. <sup>19</sup> Pedro iaimaiai Juan diga naimaci uai ote:

—Ie rafuena coco lllollena Jusiñamui jitaide. Omoi uaina coco ñnoia, Jusiñamui jitailla rafuena finoñeiticoco. Cocomo llono. ¿Bu uaina ñnoiticoco? ¿Jusiñamui?

¿Omoi? Cocomo iese llono. <sup>20</sup> Daimaiai coco ciua rafuena lloticoco. Daimaiai coco cacaja rafuena lloticoco —raite.

<sup>21</sup> Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira. <sup>22</sup> Jai jillodimiemo cuarenta años baifemo ite. Siño uaido naimie jillua jira, comini iobidimaci.

*Naimacina* Jusiñamui canollena, naimiemo jiiacino

<sup>23</sup> Iaimaiai jino jailla mei, iaimaiai nabaiñiai dine jaidiaimaiai. Illaicomini iaimaiaimo lluaana llotiaimaiai.

<sup>24</sup> Naimaci iena cacajano, Jusiñamuimo damie llua isoi jiidimaci:

—Ore Moo, mona finodio. Eniruena finodio. Monail-laina finodio. Nana naiemo ite rana jiai finodio. <sup>25</sup> Cai usuma David micorina raise uiñoticaí. Naimiedi ona sedadimie. Naimiena bie rafuena o Joreño jaie llotatajamona, naimie llote:

¿Bue ñellena Jusiñamui diga judúuaiñedino iciritimaci?

¿Bue ñellena Jusiñamuimo comini tainomo comeaiaina facadimaci?

<sup>26</sup> Illaicomini ofidimaci, Jusiñamui diga fuirillena.

Jusiñamui facaisena iñedimaci.

Cristo facaisena jiai iñedimaci

llote. <sup>27</sup> Naie rafue birui bene suide. Bie nairaimo Herodedi, Poncio Pilato diga, judúuaiñedino diga, judúuai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci. <sup>28</sup> Naimaci ofillamona, nana o jitaille rafuedi, o jaie lloga rafue diga, jai suide. <sup>29</sup> Nama naimaci jaciruitajacinona jai uiñotio. Cai comeaiaina ocuiñota, o rafuena jacitaiñeno cai llolesa. <sup>30</sup> Duidinona jilloita. O mare Jito Jesús uaido caina siño rafuena finota —jiiidimaci.

<sup>31</sup>Jusiñamuimo jhiacino fuilla meinoconi, naimaci ofira-codi jaidisite. Jusiñamui Joreño nagamihai comecimo namatade. Iemona Jusiñamui uai jacitaiñeno llocana jaidimaci.

*Creventiai* damacina illa rafue

<sup>32</sup>Nana creventiai damacina itimaci. Naimacimo rarui ai ia, dajena naimacimo duide. <sup>33</sup>Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode. <sup>34</sup>Naimaci dine buna buena jaca jitaiñedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona, <sup>35</sup>Cristo oretaganomo fecadimaci. Ie mei dueredinomo imaci jitailla isoi fecauidimaci. <sup>36</sup>Naimaci motomo José mameciredimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie. <sup>37</sup>Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

## 5

*Ananías* micori ie ai micori diga Jusiñamuina jifua rafue

<sup>1</sup>Naie facaise Ananías ie ai diga iaimai ai eniruena jiai fecade. Ie ai mamecidi Safira. <sup>2</sup>Naie iba naimiemo dabei fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona. <sup>3</sup>Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Niese Taife o comecimo namatade? Jusiñamui Joreñomo taino llotio, dabei ucube omo fiebilla jira.

<sup>4</sup>Enirue nia fecañenia, nia oie. Fecaja mei, naie ucubedi

nia oie. ¿Bue ñellena o começina maraiñoeno facadio? Cominimo taino llotio. Jusiñamuimo tainona jiai llotio.

<sup>5</sup> Ananías bie uaina cacajano ieconi fiodaillamona oni caide. Nana iena ciodino eo jacinaitimaci. <sup>6</sup> Iemei nainomo ite conirueniai naimiena feridimaci. Jino uillano, raiafomo jonetimaci.

<sup>7</sup> Naie rafue daje amani horas illanona, naimie ai ie inimo suide rafuena uiñoñoeno bite. <sup>8</sup> Pedro naiñaiño mo jicanote:

—¿Nie ñiese o fecaca o enirue? Cuemo llono.

Naiñaiño uai ote:

—Jii, ie ñiese coco fecaca.

<sup>9</sup> Pedro jicanote:

—¿Bue ñellena Jusiñamui Joreñoena jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

<sup>10</sup> Naimie ecimo ieconi naiñaiño fiodaillamona, oni caide. Conirueniai fo billano, naiñaiño fiodaillana ciodimaci. Jino uillano, ie ini abimo dafomo jonetimaci.

<sup>11</sup> Iena fidiamona, nana creyetiai eo jacinaitimaci. Nana bie rafuena fididinodi jiai eo jacinaitimaci.

*Cristo oretagano ailluena siño rafuena finodimaci*

<sup>12</sup> Comini motomo Cristo oretaganodi ailluena siño rafuena finoudimaci. Naie facaise nana naimacidi Jusiñamui jofomo Salomón micori finotaga jofu abi ibirimo ofisoidimaci. <sup>13</sup> Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

<sup>14</sup> Jaciruitimaci; iadedi creyentiaina ailluena comini jaidimaci. Ailluena iñiai, ailluena riñoñiai, ñiese creyentiaina jaidimaci. <sup>15</sup> Imaci biiramo duidinona jonecaida, naisomo atidimaci. Pedro nainomo macarillano, o lloti naimie joreño naimacimo ibaillamona, “Jillobiticai” railano, atidimaci. <sup>16</sup> Jerusalémo ie fuemo ite nairaiaimona

comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finouidimaci.

*Cristo oretagano duere sefuilla rafue*

<sup>17</sup> Cristo oretagano finoca rafueri Jusiñamui diga nanoca ñairaima eo uradoide. Nana naimie díbeimo itino jiai eo uradoidimaci. Saduceuai railla cominimo duidimaci. <sup>18</sup> Eo uradoillamona, Cristo oretaganona gaitajano, cárcelmo jonetimaci. <sup>19</sup> Naiona Jusiñamui jaienicidi cárcel nasena econote. Cristo oretagano jino atiano, naimacina raite:

<sup>20</sup> —Jusiñamui jofomo mai abido jai. Cominimo Jusiñamui dine naimaci ille rafuena llono.

<sup>21</sup> Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicominina uaidote. Cárcelmo policiaiaina oretate, Cristo oretaganona atillena. <sup>22</sup> Cárcelmo jaidemo, naimacina cioñedimaci. Abido billanona, llotimaci:

<sup>23</sup> —Cárcel ie nase jaca ibaicana ciodicai. Raise llaveca. Nase fuemo jaca soldaduai itimaci; iadedi econoticaimo, jaca buna cioñedicai.

<sup>24</sup> Jusiñamui jofo nanoca sedaraima, Jusiñamui diga ñairaini diga, bie llwana cacajano, uainicaidimaci. Comecina facadimaci: “¿Nie isoide rafue naimacimo jai suide?”

<sup>25</sup> Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

<sup>26</sup> Iena cacajano, Jusiñamui jofo nanoca sedaraima ie policías diga jibuisaide. Cristo oretaganona atide. Fe-  
cuise atide, comini dinena policiaiaina noficiaido fairinoi raillano. <sup>27</sup> Naimacina atiano, illaicomini motomo

jonetimaci. Iemei Jusiñamui diga nanoca ñairaima naimacimo llote:

<sup>28</sup> —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecabia, “Cai illaicomini Jesúna meinetimaci” llotomoi.

<sup>29</sup> Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina ñnoiacadicai. <sup>30</sup> Cai usumatiai micoriai Jusiñamuina sedauidimaci. Naie Jusiñamuidi Jesúna jai jillotate. Jesúna meinellena, cruzmo coraidomoi; ia Jesúna omoi meinia mei, <sup>31</sup> Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaramana naimiena jiai jai itatate. Cai judíuai comini comeciai iuai meidollena, naimaci jeacínuai dotallena, iese naimiena itatate. <sup>32</sup> Bie rafuena llofuecabiticai. Jusiñamui Joreño uaido iena jiai llofueticai. Jusiñamuina ñnotinomo Jusiñamuidi ie Joreñoña jai fecade —raite.

<sup>33</sup> Iena cacajano, illaicomini eo iciritimaci. Cristo oretaganona meineiacadimaci; <sup>34</sup> ia ieconi illaicomini motomo damie naidaide. Naimie mameci Gamaliel. Moisés micori llogacínona uuiicaide. Nana cominidi naimie uaina ñnotimaci. Cristo oretaganona dallu bai oni oretaganona, naimie llote:

<sup>35</sup> —Caimaci, omoi bie cominimo omoi finolle rafuemo comeciaina raise faca. <sup>36</sup> Jiaie Teudas micori illaimana jaiacade. “Jai uaina baitimiedicue” raillano, naimie díbeimo cuatrocientos iññiai jaidimaci. Iemei naimie fiodaite. Naimie micori díbeimo itinodi oni tuusite. Jai naie rafuedi jaca ieconi duide. <sup>37</sup> Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie díbeimo illena fuemo faite. Naimie jiai fiodaite. Naimie micori díbeimo itino oni tuusite. <sup>38</sup> Ie jira ja omoimo lloiticue:



Bie cominina fainonocai. Jamai cominimona naimaci llogacino iade, jamai cominimona naimaci finuacino iade, ieconí duite. <sup>39</sup> Jusiñamuimona bie rafue ia, jaca niese nibaiñeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie lluaña feiñuano, <sup>40</sup> Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci; <sup>41</sup> iadedi illaicomini illanomona Cristo oretagano caimare jaidimaci. “Jesús díbeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci. <sup>42</sup> Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai jilloitaraima” llofueuidimaci.

## 6

*Creyentia*ina canollena, siete digamie díaconuaina il-lena, fetua rafue

<sup>1</sup> Naie facaise ailluena comini creyentiaina jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoi nagarui rana feiñoñena jira, jeare ñaitimaci. <sup>2</sup> Ie jira naie doce oretaganodi creyentiai danomo ofillena, nana naimacina uaidotimaci. Naimacimo llotimaci:

—Jusiñamui uaina llollena, ra fecalle diga, abi juanide. Jusiñamui uaina llofuiana cai fainonocaiadedi, maraiñede. Ra jamai cai fecaiadedi, jiai maraiñede. <sup>3</sup> Ie jira, amatiai, omoimona siete digamiena fetu. Hinoganona fetu. Jusiñamui Joreño nana começimo namatadinona fetu. Eo abi uiñotinona fetu. Ie isoide iñiñaina fetu. Bie

ra fecarainina maijiitimaci. <sup>4</sup> Ie mei cai abi juarenite, Jusiñamuimo cai jiüllena, Jusiñamui uaina cai llofuellena.

<sup>5</sup> Nana cominidi:

—Jee —raitimaci. Esteban micorina fetodimaci. Naimie Jusiñamuina eo iinote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicoládi Antioquia nairai imie. Judíuai comini isoi naimiedi Jusiñamuina iinote. <sup>6</sup> Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

<sup>7</sup> Naie facaise Jusiñamui uaidi cominido uiñotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

*Esteban micori* ie rafue

<sup>8</sup> Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide. <sup>9</sup> Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiaide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; <sup>10</sup> iadedi naimaci uaitalle uaidi iñede. Naimacimo Esteban uai isoidiuidi iñede. Jusiñamuimona ie uaina ua jira, Esteban abina uiñuano ñaite. <sup>11</sup> Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

<sup>12</sup> Iese llumona, comini comeciaina feidocana jaidimaci. Illaicomini comeciaina feidocana jiai jaidimaci.

Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci. <sup>13</sup> Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. <sup>14</sup> Naimiedi Jesús bie jofona judaillena llote. Moisés micori caimo llogafuiai fainonocaillena jiai llote. Iena cacadicaí.

<sup>15</sup> Iemo nana illacomini naimiemo eruaidimacimo, naimie uieco Jusiñamui jaienici isoi eruaide.

## 7

*Esteban* micori abi riidua rafue

<sup>1</sup> Jusiñamui diga nanoca ñairaima Esteban micorimo jicanote:

—¿Ua ie isoi naimaci lluacino ite?

<sup>2</sup> Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairede. Cai eirue jitodi Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano <sup>3</sup> llote: “O eniruemoná mai jai. O cominimona mai jai. Omo cue acatalle eniruemo jaitio”.

<sup>4</sup> Ie jira Caldea railla eniruemoná naimie micori jaide. Harámo rillanona, diga iruillaí nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate. <sup>5</sup> Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajititcúe” raite. “O uruiaimo fecajititcúe” jiai llote; iadedi naie facaise Abraham micori uruenide. <sup>6</sup> Jusiñamui jiai llote: “O uruiaí jiaie comini eniruemo jaianiitimaci. Egiptomo

jaianiitimaci. Naimacina duere finoitimaci. Cuatro-cientos años llegí cacajitimaci. <sup>7</sup> Naimacina maijitaite nairaina duere finoiticue. Ie mei o uruiái naie eniruemoná biitimaci. Bie illanomo cuemo iobillacinona fecajitimaci” llote. <sup>8</sup> Ie cominina naimaci jaillena, Jusiñamui Abraham micorimo ísaiaí diese abina diana llote. Ie facaise Abraham micorí Isaac micorína comuitate. Ie jeiciamona ocho digarui illamona, Abraham micorí naimie micorína dete. Isaac micorí Jacob micorína comuitate. Jacob micorí doce uruiaina comuitate. Naimaci micoriaimona caí doce diga nairái comuidimaci.

<sup>9</sup> 'Caimaci, José micorína Jacob micorí uruiái micoriaí uradoillamona, Egipto cominimo naimiena fecadimaci; <sup>10</sup> iadedi Jusiñamui naimiena eo sedade. Ie llegí ie cacajamona naimiena jillotate. Naimiemo uiñoracinona fecade. Ie jira Faraón micorí naimiena jiaí gaide. Faraón micorí Egipto illaíma. Ie muidona Faraón Joséna fetode, nana Egiptomó itinona sedallena. Ie jofona jiaí sedatate. <sup>11</sup> Naie facaiseconi nana Egipto comini aime guitimaci. Canaámo Jacob micorí illanona, nana nainomo itino diga aime jiaí guite. Eo duere sefuidimaci. Caí usumatiaí micoriaí naimaci illanomo guillena baiñedimaci. <sup>12</sup> Egiptomó guille illana Jacob micorí fidiano, guille ollena, nano facaise ie uruiái micorína nainomo oretate. <sup>13</sup> Ie mei José ie amatiaina naimiena uiñotade. Faraóndi José comini illana fidide. <sup>14</sup> Ie jira Josédi ie mooná uaidote. Nana ie cominina uaidote. Setenta y cinco digamie ite. <sup>15</sup> Ie jira Egiptomó Jacob micorí jaide. Nainomo fiodaite. Ie uruiái micoriaí nainomo jiaí fiodaitimaci. <sup>16</sup> Siquem railla nairái illanomo naimaci comini naimaci micoriaína uillano, nofici ie raiafomo jonetimaci. Siquemmo Abraham micorí naifona Emmor uruiái micoriaimona jaie ibade.

<sup>17</sup> 'Caimaci, Jusiñamui Abraham micorimo lloga rafue suille iaírei illa facaiseconi, Egiptomó caí cominídi

eo jebuidimaci. Abraham micorimo: “Egiptomona o uruiái biitímaci” Jusiñamui jaie llote. <sup>18</sup> Naie facaise jiaie illaíma Egiptona sedade. José micorina uiñoñede. <sup>19</sup> Ie jira cai comínina jifuiano maijitaude. Uruiaí fio-daillena, naimacína imaci uruiaina fainonocaitate. <sup>20</sup> Ie facaiseconi Moisés micorí jeiciga. Jusiñamuimona naimie micorí eo ebire eruaide. Ie moo jofomo daje amani fivui ite. <sup>21</sup> Ie mei naimiedí fainonocaiga. Faraón jisa micoridí naimie micorina uanona, naiñaiño jito isoi naimie micorina uiuicaide. <sup>22</sup> Naimie micorí nana Egipto comíní uiñuacinona fueote. Illaíma uai isoi naimie uaidí ite. Eo abina uiñotímie.

<sup>23</sup> 'Caimaci, naimie micorí cuarenta años illa facai, ie comíní díne ie jaillemono comeceína facade. Naimie comínidí cai judíuái comíní. <sup>24</sup> Egipto imiemona damie llegí cacajana ciuano, naimiена riidote. Riiduanona, Moisés micoridí Egipto imiена meinete. <sup>25</sup> Moisés micorí comeceína facade: “Cue muidona Egiptomona Jusiñamuidí cue comínina oretate”. “Cue comíní buena uiñotímaci” raillanona comeceína facade; ie iadedí iena uiñoñedimaci. <sup>26</sup> Ie arediruido Moisés micoridí mena come iaimaiaí fuirillana ciode. Iaimaiaína marena itataiacade. Raite: “¿Bue ñellena conimana duere finoacadómico? ¿Bue ñellena o come diga fuiridómico?” <sup>27</sup> Duere finoacadímie naimiена oni ñuitade. Jicanote: “¿Bu odí cai illaimana jonegao? ¿Bu caimo ona llotatate juez isoi? <sup>28</sup> ¿Na are Egipto imie o meinia isoi cuena jiaí meineiacadio?” <sup>29</sup> Iena cacajano, come fajana naimie llinua jira, jacinaillanona, Moisés micorí aiside. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

<sup>30</sup> 'Caimaci, cuarenta años illa mei, jofue iñenanomo Moisés micorí illanona, Jusiñamui jaienici naimie micorimo bairede. Sinaí railla anedu ianori ite. Amena

boua isoi amenamo bairede. Naie boode amenadi fuiñede. <sup>31</sup> Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui lloste: <sup>32</sup> “O usumatiai imaci Jusiñamuidicue. Abraham, Isaac, Jacob, imaci Jusiñamuidicue” lloste. Jacinaillamona Moisés micori abi docaide. Jaciruillanona, erodañede. <sup>33</sup> Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidailanodi eo mareno. <sup>34</sup> Egiptomo cue comini llegi cacajana raise ciodicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” lloste; <sup>35</sup> iadedi comini dinena Moisés micorina jaie jitaiñenamona, naimiena raitimaci: “¿Bu illaimana odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jilloitaraimana jiai itatate. <sup>36</sup> Egiptomona Moisés naimacina atide. Egiptomo nia ia, diga siño rafuena finode. Jiairede monailai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

<sup>37</sup> Caimaci, Moisés micoridi cai judíuai cominimo lloste: “Omoimona Jusiñamuidi damiena ie rafue lloraimana ico oretaita, naimie cuena oretaja isoi”. <sup>38</sup> Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinái. Iemei cai usumatiai micoriai diga naie jaienici facaina Moisés ñaite. Caimo fecallena, naimiedi cominina itatate uaina feiñote; <sup>39</sup> iadedi cai usumatiai micoriai naimiena iñoiacaiñedimaci. Naimiena jitaiñedimaci. Egiptomo abido jaillemo naimaci comeciai facadimaci. <sup>40</sup> Ie jira comini dinena Aarón micorimo llotimaci: “Egipto eniruemona Moisés caina atide; iadedi naimie cai diga illana ja uiñoñedicaí. Cai facaina Jusiñamuina eruaide

jiraraina fino, Egiptomo abido caina ifollena”. <sup>41</sup> Iemo jurareta urue joreñona finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci. <sup>42</sup> Ie jira Jusiñamui naimacimona oni jaillanona, naimacina fainonocaide. Iemona jitomana sedauidimaci. Fivuina jiai sedauidimaci. Ucuaina jiai sedauidimaci. Jusiñamui rafue lloraima ie rabenicomo biena jaie iese cuega:

Jusiñamui lloste: “Judíuai imaci, cuarenta años jofue iñenanomo omoi ia, cuemo omoi faga toica ocainaiái fecañedomoi;  
<sup>43</sup> iadedi cuemo omoi comeciaina facañeno Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoína oretaiticue”

cuega. Naie facaise cai usumatiai micoriai Jusiñamuina jitaiñedimaci.

<sup>44</sup> Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo daje jofó aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega noficidi naicomo eenoga. <sup>45</sup> Josué diga bie eniruemo naimaci billa facaise, cai usumatiai micoriai naicono atidimaci. Bie enirue jiaie nairaiaimo jainaiaide; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi. <sup>46</sup> Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: <sup>47</sup> ia Salomón micoridi jofona Jusiñamui iena finode; <sup>48</sup> iadedi Jusiñamuidi iima finoca jofomo i-iñede. Jusiñamui facaina lloraima micoridi Jusiñamuina iese cuete:

49-50 Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaiñedicue” raite.

<sup>51</sup>’Ero, omoi comeciai jaiãirede. Omoi comeci ñinoñede. Jefonidomoi isoidomoi. Ie jira Jusiñamui Joreño anamo iacaiñedomoi. Omoi usumatiaï micoriaï isoi itomoi. <sup>52</sup>Omoi usumatiaï micoriaïdi nana Jusiñamui rafue lloraima micoriaïna duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue. <sup>53</sup>Jusiñamui jaieniciaïmona Moisés micori llogacinona feiñotomoi; iadedi iena ñinoñedomoi.

*Judíuaï* Esteban micorina meinia rafue

<sup>54</sup> Esteban llofuiana naimaci cacajano, eo iciritimaci. Icirillamona, isiduaï muru-muru raite. <sup>55</sup> Jusiñamui Joreño nana Esteban micori comecimo namatajamona, monamo eruailano, naimiedi Jusiñamui ebirenana ciode. Naimiedi Jusiñamui nabeimo Jesús naidaillana ciode. <sup>56</sup> Raite:

—Mona ecuaillana ciodicue. Jusiñamui Jito Jusiñamui nabeimo naidaillana ciodicue.

<sup>57</sup> Esteban lluaana cacajano, jefo oroisite. Eo cuirillano, naimie dine aisicaidimaci. <sup>58</sup> Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo ñiroina joneside. Iemei Estebana noficido fairinoside. <sup>59</sup> Estebana nofici diga fairinuano, Estebadi Jusiñamuiimo ado jiiide:

—Cue Nama Jesús, cue joreño feiño.

<sup>60</sup> Ieconï caiñici ifodo rainadacaida ado jiiide:

—Naimaci bie jeacino finua muidona, ñbana oñeno.

Iese naimie jiiã mei, fiodaite.



## 8

*Saulo creyentiaina duere finua rafue*

<sup>1-2</sup> Saulo dinena Esteban meiniana jiai jitaide. Cristo rafuena eo ñnotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiai duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jiaïnodi Samaria railla eniruemo jaidimaci; iadedi Cristo oretagano nine jaiñedimaci. <sup>3</sup> Ie facaiseconi Saulodi creyentiaina eo duere finode. Diga jofomo jamai jaillano, iññaiana gaitade, cárcelmo jonellena. Riñoniaina jiai gaitade.

*Felipe Samariumo illa rafue*

<sup>4</sup> Tuficaida jaidino naga illanomo Jesús rafuena llocana uitimaci. <sup>5</sup> Samariumo Felipedi daje nairaïmo jaide. Nainomo Cristo rafuena llofueuide. <sup>6</sup> Ailluena cominidi Felipe llofuiana eo raise feiñotimaci, naimie siño rafuena finua jira. <sup>7</sup> Felipedi diga jananiai anamo ite cominimona jananiaina oretate. Riire cuirioillano, jaidimaci. Ailluena tisitaitinona jillotate. Ailluena ñuja-ñujacaidinona jiai jillotate. <sup>8</sup> Ie jira naie nairaïmo ite comini eo iobidimaci.

<sup>9</sup> Naie nairaïmo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomiedicue.

<sup>10</sup> Nana comini naimiena ñnotimaci. Abina uiñoñedino ñnotimaci. Abina uiñotino jiai ñnotimaci. Raitimaci:

—Naimie uaidi Jusiñamui ie. Naimiedi siño jito —raitimaci. <sup>11</sup> Iese naimacina are jifujete. Naimaci rajicailla jira, naimaci naimiena cacadimaci. <sup>12</sup> Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci

comeciai iuaina meiduana llote. Naimaci Felipe llofuiana iinotimaci. Inuamona, Felipe naimacina bautizade. Iiñiaina bautizade. Riñoniaina jiai bautizade.

<sup>13</sup> —Jiai iinoticue —Simóndi raite. Naimie bautizaja mei, Felipe diga jaiocaide. Felipedi diga siño rafuena finua jira, Simón naiena ciuano, rajicaide.

<sup>14</sup> Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaimaiai Juan diga, batine oredimaci. <sup>15</sup> Iaimaiai rillano, naimaci Jusiñamui Joreñaona feiñollena Jusiñamuimo jiidiaimaiai, <sup>16</sup> naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreñaona nia feiñoñedimaci. <sup>17</sup> Ieconi iaimaiai onolli naimacimo joniano, Jusiñamui Joreñaona feiñotimaci.

<sup>18</sup> Naimaci Jusiñamui Joreño feiñuana Simóndi ciuano, ucubena iaimaiaimo feacaade. <sup>19</sup> Raite:

—Cuemo omico uaina ine, bummo cue onollina cue joni-  
amona, naimie Jusiñamui Joreñaona feiñollena.

<sup>20</sup> Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naiena jamai fecade.

<sup>21</sup> Bie rafuedi omo duiñede. Jusiñamuimona o comecei nia maraiñede. <sup>22</sup> O comecei iuai meido. Naimie o comeceimo ite maraiñede facajacinuaina oni dotallena, cai Namamo jica. <sup>23</sup> Omo ailluena maraiñedicino illana uiñoticue. O comecei eo uradoide. Maraiñedinona o comeceimo namaredio.

<sup>24</sup> Simón uai ote:

—O llua cuemo suiñellena, o Nama diga cue facaina ñaino.

<sup>25</sup> Cristo rafuena iaimaiai llua mei, Jerusalémo abido bitiaimaiai. Abido billano, Samariamo diga comini illanuaimo Jesús ie mare rafuena llocana bitiaimaiai.

*Etiopía imie* creyentena jailla rafue

<sup>26</sup> Naie facaise Jusiñamui jaienisaïmona damie Felipemo llote:

—Beicido joide naido mai jai. Jerusalémona Gazamo joide naisona jai —llote. Naie naiso jofue iñenanodo joide.

<sup>27</sup> Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijjuide. Naiñaiño mamecidi Candace. Naimiedi nana naiñaiño gobierno ucubena sedade. <sup>28</sup> Naimie jai abido jaillano, ie carretamo raita, Isaías micori cuela rabenicono ado facade. <sup>29</sup> Jusiñamui Joreño Felipemo llote:

—Naimie dine iaïrei jai. Carreta dine jai.

<sup>30</sup> Naimie dine Felipedi aisicana jaillanona, rabe ado facajana cacade. Felipe dinena naimiemo jïcanote:

—¿O facaca rabenicono uiñotio?

<sup>31</sup> Naimie uai ote:

—¿Niese uiñoiticue, bu cuena canoñenia?

Felipemo jïcanote, naimie diga a jaillano danomo raïllena.

<sup>32</sup> Naimie facaca cuela fue iese raite:

Toica llauda fallena uilla isoi, naimiëna uitimaci.

Toica llauda itirai garedino dine eeñena isoi, naimie ñaiñede.

Ie abina riidollena, uaina oñede.

<sup>33</sup> Maraiñede rafuena naimie fiñoñede; ia naimiëna duere finodimaci.

Naimie uruai iñededí, ¿bu naimie rafuena lloite?

Meinia meinoconi, naimie jai iñede.

<sup>34</sup> Etiopía imie Felipemo jïcanote:

—¿Bie lloraïma bu iena llote? ¿Dama naimie iena llote? ¿Jiaïmiena iena llote? Cuemo llono.

<sup>35</sup> Iemei Felipedi bie cuela fue iamona naimiemo Jesús ie mare rafuena llote. <sup>36</sup> Naisona jaidiaïmaïaïmo, jinui illanomo ridiaïmaïaï. Etiopía imie dinena raite:

—Ero, bie jinui itemo, ¿bue ñe cuedi bautizañellicue?

<sup>37</sup> Felipe uai ote:

—O comecimona o ñinoia, cuemona mare.

Naimie uai ote:

—Jesucristodi Jusiñamui Jitonana ñnoticue.

<sup>38</sup> Naimie ie carreta jorodate. Iemei jinui dine jaidiiaimaia. Felipedi naimiena bautizade. <sup>39</sup> Jinuimona iaiaimaia bia, Jusiñamui Joreño Felipeña oni uite. Etiopía imie Felipeña dane cioiñede; iadedi Etiopía imie iobicana jaide. <sup>40</sup> Jusiñamui Joreño Azotomo Felipeña uite. Cesarea dine naimie jaillanona, naga nairaiaimo Jesús ie mare rafuena llocana uite. Ie mei Cesareamo ride.

## 9

### *Saulo creyentena jailla rafue*

*(Hch 22.6-16; 26.12-18)*

<sup>1</sup> Naie facaise Saulo cai Nama Cristona ñnotinona eo duere finoacade. Icirillamona, naimacina meineiacade. Ie jira Jusiñamui diga nanoca ñairaima dine jaide. <sup>2</sup> Judíuai comini naie ñairaima anamo illamona, creyentiaina duere finollena, Saulo cartana naimiemo jicajaide. Damascomo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. Iñiaia baia, riñoniaia baia, naimacina Jerusalémo atiacade. <sup>3</sup> Cartana ua mei, naimie jaillano, Damascomo iaire ia, ieconi monamona damie naimie abina quetiñote. <sup>4</sup> Eniruemo naimie ana uaillano, monamona damie naimiemo llwana cacade:

—Saulo, Saulo, ¿bue ñellena cuena duere finodio?

<sup>5</sup> Naimie uai ote:

—¿Budío?

Monamona damie raita:

—Jesúdicue. Cuena duere finodio. Iemona o abina duere finodio, riicaillamona raise maíga jurareta suiñoacana isoi. Ie isoidio. Riicaillamona, cuena duere finoacadio. <sup>6</sup> Naidacai. Damasco mai jai. Nainomo o finolle rafue omo lloiticue.

<sup>7</sup> Saulo diga jaidinodi ñaiñeno naidaidimaci. Naie uaina cacadimaci; iadedi buna cioñedimaci. <sup>8</sup> Iecon Saulo naidacaide. Ie uisi ecoricaillamona, erodatemo, jai buena cioñede. Ie onollina llinocaida, naimiena Damasco uitimaci. <sup>9</sup> Darui amani cioñede. Jusiñamui comequina facajamona, guiñede. Jiai jiroñede.

<sup>10</sup> Damasco Ananíana mameciredimie ite. Naimiedi creyente. Iníñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

<sup>11</sup> Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicomo Tarso ie Saulona jicano. Naimie cuemo jai jiide. <sup>12</sup> Naimie damiena jai nicairite isoide. Ananíana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

<sup>13</sup> Ananías uai ote:

—Nama, diga cominimona naimiena fididicai. Jerusalémo naimiedi marañede rafuena ona inotinomo finode. <sup>14</sup> Jusiñamui diga nanoca ñairaima uai naimiemo ite, nana bene ite creyentiaina gaitallena.

<sup>15</sup> Cai Nama naimiemo llote:

—Mai. Naimie jai cue fetoca, judúuaiñedinomo cue rafuena llollena, illaicominimo cuena llollena, judúuai cominimo cue rafuena jiai llollena. <sup>16</sup> Cuena naimie jai inua muidona, naimie nie isoi legi cacajite. Naimiemo iena lloiticue.

<sup>17</sup> Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatal-lena.

<sup>18</sup> Iecon Saulo uisimona lliciai ico isoide ra uaide. Dane ciuana, naidaide. Ie mei jai bautizaga. <sup>19</sup> Ie mei jai guite. Dane mairide. Diga irui Damascomo ite creyentiai diga naimie ite.

#### *Damascomo Saulo illa rafue*

<sup>20</sup> Judúuai ofiracomo naimie jaillanona, Jesús ie rafuena llofuate. “Jesúdi Jusiñamui Jito” raillanona llofuate.

<sup>21</sup> Nana naimiena cacadinodi rajicaide. Raitimaci:

—Bimie Jerusalémo Jesúsna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús díbeimo jai ite.

<sup>22</sup> Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofua jira, judúuai dinena iena uaitanidimaci.

<sup>23</sup> Digarui illa mei, judúuai comeciaina facadimaci, naimiena meinellena. <sup>24</sup> Naimie aisii raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano, <sup>25</sup> naiona creyentiai naimiena oni uitimaci. Naimie jillobillena, llaigafu jinofebeimo cirigaimo rainajanona, naimiena ana ñuitadimaci.

#### *Jerusalémo Saulo illa rafue*

<sup>26</sup> Jerusalémo naimie jaide. Naimie ria, creyentiaina nabaiacade; ia naimiena jaciruitimaci. Creyentena naimie jaillana ñinoñedimaci. <sup>27</sup> Ie jira Bernabé naimiena Cristo oretagano dine uillano, naimacimo naiso

motomo Saulo cai Namana ciuana lloste. Naiso motomo cai Nama Saulomo lluana jiai lloste. Damascomo naimie ia, Jesúna jacitaiñeno llofuiana jiai lloste. <sup>28</sup> Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide. <sup>29</sup> Iena cacajanona, griego uaina ñaite judfuaidi naimie llofuiana uaitatimaci. Naimiena meineiacadimaci. <sup>30</sup> Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

<sup>31</sup> Judeamo, Galileamo, Samariamo nana creyentiai uri itimaci. Cai Namana inocana jaidimaci. Cai Namana jaciruiocaida jaidimaci. Jusiñamui Joreño naimaci comeiaina eo ocuiñotade. Ailluena comini creyentiaina jaidimaci.

### *Eneas jillua rafue*

<sup>32</sup> Naie facaise diga illanuaimo Pedro macarite. Lidamo ite creyentiai dine ride. <sup>33</sup> Nainomo damie biiramo biidena ciode. Naimiedi Eneas. Ocho años tisitailamona biide. <sup>34</sup> Naimiena ciuano, Pedro naimiemo lloste:

—Eneas, Jesucristo ona jai jillotate. Mai naidacai. O biira feri. —Iecon naimiedi naidadate. <sup>35</sup> Nana Lidamo ite comini, nana Sarónmo ite comini diga, naimiena jilluana ciuanona, creyentiaina jaidimaci.

### *Fiodaillamona Dorcas jillua rafue*

<sup>36</sup> Jopemo Tabitana mamecirediñaiño ite. Griego uaimona oni dobaiñuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide. <sup>37</sup> Naie facaise naiñaiño duicotaide. Ie mei fiodaite. Naimaci einamací finua isoi, ie nabaiñiai naiñaiño abina jocodimaci. Iemei aneba ie cuartomo naiñaiñoona jonetimaci. <sup>38</sup> Lidamona Jope iaire ite. Pedro Lidamo creyentiai illana fidiano, menamie naimie dine oredimaci. Iaimaiaina llotatimaci:

—Buena sedañeno cai dine raire bi.

<sup>39</sup> Ie jira Pedro naidacaida, naie iaiaiaia diga jaide. Naimie ria, aneba ie cuartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimiemo acatatimaci. <sup>40</sup> Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raita, Jusiñamuimo jiiide. Abido dobaicaida, naiñaiño erodate. Raite:

—Tabita, mai rainaicai.

Ieconí naiñaiño uisi oni erodate. Pedrona ciuano, a rainadate. <sup>41</sup> Naiñaiño onolli llinuanona, a naidanete. Ie mei Pedrodi feciñuaina, jiaie creyentiaia diga, uaidote, naiñaiño jai cajenana naimaci cioillena. <sup>42</sup> Nana Jopemo ite comini naie rafuena fididimaci. Ie jira ailluena comini cai Namana iinotimaci. <sup>43</sup> Jopemo Pedro diga irui Simón jofomo ite. Simóndi ocaina igoina cuidoraima.

## 10

*Cornelio comei* iuai meidua rafue

<sup>1</sup> Cornelio raillamiedi Cesareamo ite. Naimiedi capitán. Italamona bite soldaduai naimie anamo itimaci.

<sup>2</sup> Naimiedi Jusiñamui llogacinodo jaide. Nana ie comini diga Jusiñamuina iinote. Judíuai cominimo ailluena rana jamai fecauide. Jusiñamuimo jiiuide. <sup>3</sup> Jitoma ana ia, naimiemo jai nicairilla isoi ite. Naimiedi Jusiñamui jaienicina naimie dine billana ciode. Jaienicidi uaidote:

—Cornelio.

<sup>4</sup> Naimiena Cornelio jaciruiocaida eruaide. Jicanote:

—Nama, ¿buena jitaideo?

Naimie uai ote:

—Jusiñamui o jiiacinuaina jai cacade. Jusiñamuidi duerede cominina o canuana jiai feitañede. <sup>5</sup> Mai, Jopemo damierie o mullaiaimona oreta, Simón raillamiena atillena. Naimie jiaie mamecidi Pedro. <sup>6</sup> Naimiedi



igoĩ cuidoraima jofomo ite. Naie cuidoraima mamecidi Simón. Monailai fuemo naimie jofo ite.

<sup>7</sup> Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiai uaidote. Naie soldadodi Jusiñamuina jiai iñnote. <sup>8</sup> Nana naimiemo Jusiñamui jaienici lluaana naimacimo llua mei, Jopemo oretate. <sup>9</sup> Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jiillena. <sup>10</sup> Naimie aimetaite. Guiacade. Guillena comini finodemo, naimiemo nicairilla isoi ite. <sup>11</sup> Mona oni econuana ciode. Aillue sávana isoi, buena ana billana ciode. Eniruemo naga muiduedo maigado ana bite. <sup>12</sup> Naiemo jiaiforie eruaide ocainaii ite. Diga eniruemo jorode raniai ite. Diga nuiciniai jiai ite. Nana Moisés micori fimaidoga rille radi ite. <sup>13</sup> Naimiedi monamona damie lluaana cacade:

—Pedro, naidacaida, fajano, buena rino.

<sup>14</sup> Pedro uai ote:

—Nama, dama ite. Moisés micori fimaidoga rille rana jaca riñedicue.

<sup>15</sup> Monamona damie lluaana dane cacade:

—Jusiñamui jai fimaidoñede. Ie jira iese lloño.

<sup>16</sup> Dacaiño amani iese suide. Ie mei naie radi monamo abido jaide.

<sup>17</sup> Pedro ie comecina facade: “¿Ñiese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride. <sup>18</sup> Simón Pedrona naie jofomo illana jicanotimaci. <sup>19</sup> Pedro ie nicairillana isoidemo comecina facajano, Jusiñamui Joreño naimiemo llote:

—Ero, daje amani iima ona jenode. <sup>20</sup> Naidacaida, ana jai. Naimaci diga buena sedaño mai jai. O dine naimacina oredicue.

<sup>21</sup> Pedrodi comini dine ana jaide. Raite:

—Omoi jenocamiedicue. ¿Bue ñiaibitomoï billa?

<sup>22</sup> Uai otimaci:

—Cornelio raillamie anamo iticai. Cornelio mo Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina iñotimie. Nana judíuui comini dinena naimiedi mareuidimie.

<sup>23</sup> Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiai naimie diga jiai jaidimaci. <sup>24</sup> Ie are Cesareamo ridimaci. Cornelio naimaci billemo ocuiride. Nana ie cominina jai uaidote. Ie nabaiñiai jiai jai uaidote.

<sup>25</sup> Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena. <sup>26</sup> Pedrodi naimiena a naidanete. Raite:

—Mai a naidada. Cue jiai jamai iimadicue.

<sup>27</sup> Naimie diga ñaiano fo jaidiaimaiaï. Ailluena comini ofillana ciode. <sup>28</sup> Naimacimo llote:

—Moisés micori judío imie judíuñedimie nabairillana rairuide. Iena uiñotomoï. Judíuñedimie jofomo illana jiai rairuide. Ie areruido Jusiñamui nicairilla isoidifuenta cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoïna cue jearuillana jai jitañede. <sup>29</sup> Ie jira buena sedaño biticue, cuena o uaidua jira. ¿Bue ñellena cuena uaidotomoï? Cuemo llono.

<sup>30</sup> Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Ieconí Jusiñamui jaienici cuemo bairede. Naimie iniroi quenirede. <sup>31</sup> Cuena raite: “Jusiñamui o jiaana cacade. Naimiedi duerede cominina o canuana feitañede. <sup>32</sup> Ie jira Jopemo damieriena oreta,

Simón Pedrona uaidollena. Jiaie Simón jofomo ite. Simóndi igoi cuidoraíma. Ie jofo monaillai fuemo ite”.  
<sup>33</sup> Iemona ona uaidoticue. O comeci marena jira, bene bitio. Jai nana bene iticai. Jusiñamui cai diga jiai ite. Cai Nama nana omo llwana cacareillena, bene iticai.

### *Corneliomo Pedro llua rafue*

<sup>34</sup> Pedro uai ote:

—Jusiñamui nana comini naimie iñuana jitaillana jai uiñoticue. <sup>35</sup> Naga nairaimona Jusiñamuidi cominina jai jitaide. Bu naimiena iñoia, bu mare rafuedo jai, Jusiñamui naimiena jai jitaide. <sup>36</sup> Cai judúai cominimo Jesucristo llumona, Jusiñamui díbeimo cai illena jai uiñoticai. Iemona Jusiñamui diga cai uri illana jai jiai uiñoticai. Jesúdi nana cai Nama. Bie rafuena navui janore fididomoi. <sup>37</sup> Nana Judeamo bie rafue llocana jai jaide. Juan micori bautizajana llua mei, Galileamo Jesús naimie llofuiana tainede. <sup>38</sup> Jusiñamuidi ie Joreñaona Jesúmo fecade. Jesúdi Nazaret imie. Naimiemo ie uaina jiai fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. <sup>39</sup> Judúai eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; <sup>40</sup> iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiai ciodicai. <sup>41</sup> Nana comini naimiena cioiñedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uiñua jira, Jusiñamui caina fetode, naie rafuena llollena. <sup>42</sup> Cominimo bie rafuena llwana caimo llole. Jusiñamui Jesúna jai fetode, naimiena iñoñedinona duere finollena. Nia fiodaiñedinona duere finoite. Jai

fiodaitinona jiaí duere finoite. Ie jira Jesús rafuena llocana jaidícaí. <sup>43</sup> Jesús muidona naga naimiena inotimie ie maraiñedicinodí Jusiñamui dotalle. Iena nana Jusiñamui facaina lloraini micoriai jaie llotimaci.

*Judíuái*ñedíno Jusiñamui Joreñona feiñua rafue

<sup>44</sup> Pedro biena nia llofueia, Jusiñamui Joreño nana bie rafuena cacadinomo bite. <sup>45</sup> Iena ciuanona, Pedro diga bite creyentiaí rajicaidimaci. Naimacídí judíuái cominí. Judíuáiñede cominímo Jusiñamui ie Joreño jai fecaja jira, rajicaidimaci. <sup>46</sup> Jusiñamui Joreño naimacímó illamona, judíuáiñedinodí jiaie nairai uailaído ñaitimaci. Naie ñaia uailaina uiñoñedinaci. Jusiñamuimo iobillacinona jai fecadimaci. Pedro diga bitino iena cacajano, rajicaidimaci. Iemei Pedro raite:

<sup>47</sup> —Cái feiñua isoi, Jusiñamui Joreñona jiaí feiñotomoi. Omoi bautizallena jaca budi rairuiñeite.

<sup>48</sup> Ie jira naimiedí naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

## 11

*Jerusalémo Pedro*dí naimiemo jai suide rafuena llote

<sup>1</sup> Judeamo ite Cristo oretagano, jiaie creyentiaí diga, judíuáiñede cominí Jusiñamui uaina feiñuana fididimaci.

<sup>2</sup> Pedro Jerusalémo abido ria, judíuái cominí naimiena icidimaci. <sup>3</sup> Jicanotimaci:

—¿Bue ñellena judíuáiñedíno jofomo jaidío? ¿Bue ñellena naimaci diga guitío?

<sup>4</sup> Pedro uai uanona, naimacímó naie rafuena nacinuaina llote:

<sup>5</sup> —Jopemo navui cue ia, Jusiñamuimo cue jñia, nicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga

diga. Cuemo ana ride. <sup>6</sup> Nainomo eruaidicue, diga rana ciodicue: ocainaiaina, eniruemo jorocana jaidinona, nuiciniaina. Iena ciodicue. <sup>7</sup> Monamona damie cuemo lluaana cacadicue. Raite: “Pedro, naidacaillanona, fajanona, rino”. <sup>8</sup> Naie uai oticue: “Nama, dama ite. Moisés micori fimaidoga rille rana jaca riñedicue”. <sup>9</sup> Monamona dane cuemo lloste: “Jusiñamui iena jai fimaidoñede. Ie jira iese lloñeno”. <sup>10</sup> Dacaiño amani iese suide. Ie mei monamo nana abido dane jaide. <sup>11</sup> Ieconí daje amani iima cai illa jofomo ridimaci. Cesareamona cue dine damie naimacina orede. <sup>12</sup> Jusiñamui Joreño di naimaci diga buena sedaño cue jaillena cuemo lloste. Cue diga seis creyentiaí jiaí jaidimaci. Cuená uaidotimie jofomo jaidicai. <sup>13</sup> Nainomo cai rilla mei, naimie ie jofomo Jusiñamui jaienicina navui ciuana caimo lloste. Naie jaienici naimiemo lloste: “Jopemo cominina oreta, Simón Pedrona atillena. <sup>14</sup> O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” lloste. Ie jira naimie cuena uaidote. <sup>15</sup> Nainomo cue llofuia facaiseconi, nano dofoconi caimo billa isoi, Jusiñamui Joreño naimacimo bite. <sup>16</sup> Iena cue ciuamona, cai Nama Jesús lloga uaina comeciticue. Naimie navui lloste: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreño birui feiñoitomoí”. <sup>17</sup> Cai Nama Jesucristona cai inuamona, Jusiñamuidi ie Joreño caimo navui fecade. Naimacimo daje isoi birui fecademo, ¿niese Jusiñamui díbeimo iñeiticue?

<sup>18</sup> Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuainede comini comeciái iuai meiduana jai jitaide. Naimie díbeimo naimaci illana jai jitaide. Ie jira naimieri iobidicai.

*Antioquíamo ite creyentiai illa rafue*

<sup>19</sup> Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judúuai cominimo naimaci rafuena llotimaci; <sup>20</sup> iadedi tuficaidinomona jiaíno Chripremona billanona, Cirenemona billanona, Antioquíamo rillano, judúuaiñedinomo cai Nama Jesús rafuena llotimaci. <sup>21</sup> Cristo uai naimacimo illamona, ailluena comini ñnotimaci. Cai Nama ñbeimo jaidimaci. <sup>22</sup> Jerusalémo ite creyentiai iena fidiano, Antioquíamo Bernabéna oretatimaci. <sup>23</sup> Naimie ria, naimaci marena illamona, naimiedi Jusiñamui naimacina dueruillana uifñote. Ie jira iobide. Imaci comeciai ocuiñocana ñnocana jaillana naimacimo llote. <sup>24</sup> Naimiedi maremie Jusiñamui Joreño nana naimie comecimo namatadimie. Jusiñamuina eo ñnotimie. Naie facaise ailluena comini creyentiaina jaidimaci.

<sup>25</sup> Ie mei Tarsomo Bernabé Saulona jenuaide. Naimiena baillanona, Antioquíamo naimiena uite. <sup>26</sup> Daje año creyentiai diga nabairillanona, naimacina llofuetiaimaiai. Antioquíamo creyentiaidi cristianona nano mameciredimaci.

<sup>27</sup> Iemei Jerusalémona Antioquíamo damierie Jusiñamui rafuena lloraini bitimaci. <sup>28</sup> Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci. —Claudio illaimana illa facaiseconi iese jai suide. <sup>29</sup> Ie jira Antioquíamo ite creyentiaidi, Judeamo ite creyentiaimo, ucubena oretiacadimaci. <sup>30</sup> Nagamiai imacimo illa dierise ucubena oredimaci. Creyentiaina llofuerainimo Bernabé diga, iaimaiai Saulo diga, naie ucubena oredimaci.

## 12

*Herodes Agripad* di creyentiaina duere finua rafue

<sup>1</sup> Naie facaise Herodes railla illaimadi creyentiaimona damieriena gaitatate, naimacina duere finollena. <sup>2</sup> Lloebi diga Jacobo cimaiona jaitatate. Jacobodi Juan ama. <sup>3</sup> Ieri judíuai illaicomini iobidimaci. Iena uiñuamona, Herodes Pedrona jiai gaitatate. <sup>4</sup> Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomo naimiena meineiacade. <sup>5</sup> Ie jira Pedro cárcelmo fiebide; iadedi creyentiai naimie facaina eo jiidimaci. <sup>6</sup> Herodes naimiena meineiacanarui naio Pedro soldaduai motomo inide. Mena lloeo diga maiga. Soldaduai cárcel nasena jiai sedadimaci. <sup>7</sup> Ieconi cai Nama ie jaienicidi cárcelmo bairede. Cárcelmo lligaiñote. Naimiena casitallena, jaienici Pedro ciragina jetade. Raite:

—Raire naidacai.

Ie mei naimie onollimo ite lloedi oni uaide. <sup>8</sup> Jaienici naimiena raite:

—O iniroina jita. O zapatona jiai jita— Iena jitaja mei, naie jaienici dane raite—. O iniroi o abimo ferino. Cue diga mai bi.

<sup>9</sup> Naie jaienici jinafona Pedro jino jaide. Pedrodi naie jaienici naimiemo finoca rafuena uiñoñede.

—Nicairilla isoi comeцина facadicue —raite. <sup>10</sup> Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaimaia. Daje calle jaillanona, jaienici naimiena fainoocaide. <sup>11</sup> Iemona Pedro naimiemo suide rafuena jai uiñoacaide. Raite:

—Cue Nama ie jaienicina uanai oretate. Herodemonu cuena jillobitade. Judíuai illaicomini cue meinellena cue sedajamona cuena jillobitade.

<sup>12</sup> Iena jai naimie uíñuano, María jofomo jaide. Maríadi Juan Marcos ei. Jusiñamuimo jillena, naicomo ailluena comini ofidimaci. <sup>13</sup> Rillanona calle fuemo ite nasena tute. Daje mullaño bite. Naiñaiño mamecidi Rode. <sup>14</sup> Naimie uaiduamona, naiñaiño Pedro uaina uíñote. Iobilla jira, nase econoñede; iadedi abido fo aiside. Pedro nasemo illana llote. <sup>15</sup> Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

<sup>16</sup> Pedro nasena nia tua jira, nasena econuaibitimaci. Econuamona naimiena naimaci ciuamona, rajicaidimaci.

<sup>17</sup> Fo jaillano, Pedro ie onolli jaidide, naimaci llicaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiaimo iena jiai llono.

Ie mei Pedro jino jaillano, jiaínomo jaide.

<sup>18</sup> Monaidemo, Pedro nainomo iñena jira, soldaduai rajiccaillanona, siadotimaci. <sup>19</sup> Herodes iena fidiano, naimiena jenotate. Naimiena baiñenia, soldaduaimo jicanote. Baiñena jira, naimacina meinellena llote. Iemei Judeamona Cesareamo Herodedi jaide.

*Herodes micori* fiodailla rafue

<sup>20</sup> Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci díbeimo naimie illena. Herodes eniruemona



naimaci guille billa jira, uri illena naimiemo jicanote. <sup>21</sup> Naie cominina Herodes feiñollena, ie ebirede iniroina jítade. Naimacina feiñollena, ie rairabicimo raide. Iemona raíta, rafuena are llote. <sup>22</sup> Iena cacajano, comini ado cuiridimaci:

—Jamai ñimadi ñaiñena. ¡Jusiñamui ñaia!

<sup>23</sup> “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobil-lacino naimie fecañena jira, aiaí naimiena aite. Iemona naimiedi fiodaite.

<sup>24</sup> Naie facaiseconi Jusiñamui uai llocana jaide. Ailluena comini iena ñnotimaci.

<sup>25</sup> Iaímaiaí uiga ucube illanona, Bernabé, Saulo díga, Jerusalémona Antioquíamo abído bitíiaímaiaí. Juan Marcos jíai atídíiaímaiaí.

## 13

*Bernabéna, iaímaiaí* Saulo díga, fetua rafue

<sup>1</sup> Antioquíamo creyentiaí motomo Jusiñamui facaina lloraini itimaci. Llofueraíni jíai itimaci: Bernabé, Simón. Simóndi jiaíe mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jíai ite. <sup>2</sup> Naimaci Jusiñamuina sedajamona, guiñenaruillaí ia, Jusiñamui Joreño naimacimo llote:

—Bernabé iaímaiaí Saulo díga feto, cuejena. Cue rafuena iaímaiaí lllollena, iaímaiaína jai fetodícue.

<sup>3</sup> Jusiñamuimo naimaci jíia mei, Jusiñamui iaímaiaína fetuana naimaci uiñuamona, naimaci onolli iaímaiaímo jonia mei, iaímaiaína naimacimona oni oretatimaci.

*Pablo, iaímaiaí* Bernabé díga, Chipremo illa rafue

<sup>4</sup> Iaímaiaína Jusiñamui Joreño oretaja jira, Seleuciamo jaidíiaímaiaí. Nainomona botedo Chipremo jaidíiaímaiaí. Chipredí uiasi. <sup>5</sup> Chipremo ria, Salaminamo judíuai

ofiracuaimo Jusiñamui uaina llofuetiiaimaiai. Juan Marcos iaimaiai diga jiai jaide. <sup>6</sup> Nana naie uiasimo jailanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraima. “Jusiñamui rafuena lloticue” raite; iadedi taino lloraima. <sup>7</sup> Gobernador diga maijiuide. Gobernadori Sergio Paulo. Gobernadori abina uiñotimie. Jusiñamui uaina cacacana jira, naimie Bernabé iaimaiai Saulo diga uaidote. <sup>8</sup> Barjesús ie jiaie mamecidi Elimas. Naie iaimaiai llofuiana uaitate. Gobernador iinuana jitaiñede. <sup>9</sup> Saulodi jiaie mameci Pablo. Pablo dinena naimiena eo eruailano, Jusiñamui Joreño nana Pablo comecimo namatajamona, <sup>10</sup> naimiemo llote:

—¡Eo jifueraimadio! ¡Eo maraiñedio! ¡Taife díbeimo itio! Nana mare rafue díbeimo iñedio. Cai Nama ie mare uanaicinona dobairaidodio. <sup>11</sup> Cai Nama ie uaido ona ja iracotaitaiticue. Nano nigarui useredinona cioiñeítio.

Ieconí naimie cioiñede. Cominina jenuaide, ie onollido llinocaida ie uillena. <sup>12</sup> Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaite.

### *Jesús rafuena llocana jaidiiaimaiai*

<sup>13</sup> Pafomona botedo Pablo ie nabaiñiai diga jaide. Perge railla nairaimo ride. Perge Panfilia railla eniruemo ite. Juan Marcos iaimaiaina fainonocaida, Jerusalémo abido jaide. <sup>14</sup> Pergemona Antioquíamo jaidiiaimaiai. Pisidia railla eniruemo Antioquía ite. Sábadoruimo judíuai ofiracomo jaillano, ana raidiiaimaiai. <sup>15</sup> Moisés micorí ciegafuena facaja mei, Jusiñamui facaina lloraini micoriai ciegafuena facaja mei, judíuai ofiraco sedadino iaimaiaimo llotimaci:

—Caimaci, cominimo fue omico lloiacania, mai llono.

<sup>16</sup> Pablo naidadajano, ie onollina jaidide, comini lliicaillena. Raite:

—Jusiñamuina sedallena bene itomoi. Omoimona damierie judfuaidomoi. Jiaino judfuaifnedomoi; iadedi judfuai isoi Jusiñamuina sedadomoi. Cue lluomo mai cacarei. <sup>17</sup> Iemona omoi fueollena, cai jaiagai rafuena lloiticue. Cai judfuai comini Jusiñamuina birui sedadicaí. Naimiedi cai jaiagaina jaie fetode. Egiptomo naimacia, naimacina eo jebuitate. Nainomona ie siño uai diga naimacina atide. <sup>18</sup> Jofue iñenanomo cuarenta años naimacina canode. <sup>19</sup> Canaán eniruemo siete nairaina cuenode. Cai jaiagaimo, naimaci uruiaí diga, naie eniruena fecade, naimaci iena. <sup>20</sup> Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitaifnedimaci. Samuel micoridi Jusiñamui facaina lloraima. <sup>21</sup> Illaimana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatiai micoriaina sedade. <sup>22</sup> Naimie ifo meidollena, naimaci illaimana illena, Jusiñamui David micorina fetode. Naimiedi Isai micori jito. Jusiñamui naimie micorina llote: “Bimie eo cue comecido jaidimie. Nana cue jitaille rafuena fñoite”. <sup>23</sup> Jusiñamui llua isoi, David micori uruiaimona Jesúdi cai judfuai comini Jilloitaraimana jaide. <sup>24</sup> Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona fainonocaida, Jusiñamui dibeimo omoi comeciai iuailai meido. Iena omoi meidoia, comini iena uiñotallena, mai omoi bautizallomoi”. <sup>25</sup> Juan micori ie llofuia fuillamona, raite: “Omoi comeci facajamieñedicue. Cue ifomo jiaimiena meidoite.

Naimie isoïñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

<sup>26</sup> 'Caimaci, cai eirue jito Abraham micorimona comuidicai. Jusiñamuina birui sedadicai. Ie jira cai jeacinomona naimie jilloitalle rafue caimo duide. Jesúna ñaiticue. <sup>27</sup> Jerusalémo itinodi, cai illaicomini diga, Jesúna jaie meinetimaci. Naga sábado Jusiñamui facaina lloraini micoriai cuegafuiaina facadimaci; iadedi iena raise cacaiñedimaci. Jesúna naimaci meiniamona, Jusiñamui lloraini micoriai cuegafuiaina jai suitatimaci. <sup>28</sup> Jesús maraiñede rafuena finoñede; iadedi naimiena meinetimaci. Pilatomo jicanotimaci, naimiena meinelena. <sup>29</sup> Nana Jusiñamui facaina lloraini micoriai cuegafuiaina suilla mei, cruzmona naimie ana uano, nofici ie raiafomo naimiena jonetimaci; <sup>30</sup> iadedi fiodaillamona Jusiñamui naimiena jillotate. <sup>31</sup> Galileamona Jerusalémo naimie diga jaidino naimiena diga icaiño ciodimaci. Iemei cominimo naimie rafuena jai llocabitimaci. <sup>32</sup> Jusiñamui cai jaiagaimo jaie lloga rafue jai suide. Iena omoïmo ja lloiticoco. <sup>33</sup> Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cuela: “Jusiñamui llote: ‘Cue jitodio. Birui ona Jilloitaraimana itataticue’ ”. <sup>34</sup> Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiai raite: “Davidmo cue llogacinona omoi facaina jaca finojiticue”. <sup>35</sup> David micori jiaie salmomo iena cuete: “O mareuidimie jaca rifaillana jitaiñedio” raite. <sup>36</sup> Jusiñamui David micorina ñaiñede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide; <sup>37</sup> iadedi Jusiñamui jito abidi ie isoi rifaiñede.

<sup>38</sup> 'Caimaci, daje rafue omoïmo lloiacadicue. Jesús fio-

dailla jira, Jusiñamui omoi jeacino oni dotaacade. Moisés micori llogacinodi omoi maraiñedicinomona omoína jillotañede; <sup>39</sup> iadedi Jesúna birui omoi ñnoia, omoi jeacino anamona jilloitomoí. <sup>40</sup> Abina omoi rairui, Jusiñamui facaina lloraini micoriai jaie ciegafuiaí omoímo sui rail-lano. Jaie cuetímaci:

<sup>41</sup> Ero, Jusiñamui uaina jamaidomoí. Ieri rajicaidomoí; iadedi faifidomoí.

Omoi motomo siño mare rafuena birui finodicue.

Bu omoímo iena iese lloia, bie rafuena ñnoñeitomoí.

Ie isoi omoímo suiñellena, Jesúna birui omoi mai ñno.

<sup>42</sup> Ie mei Pablo lliicaide. Iaimaiaí jino jaidemo, comini iaimaiaímo jicanotímaci, jaie sábadoruimo bie rafuena naimacimo dane llollena. <sup>43</sup> Comini jino jailla mei, ailluena comini Pablo, iaimaiaí Bernabé diga, ñaicana jaidímaci. Judúuai iese jaidímaci. Judúuaiñedino iese jiai jaidímaci. Naie judúuaiñedínodi judúuai isoi Jusiñamuina ñnotímaci. Pablo, iaimaiaí Bernabé diga, ñaicana jail-lanona, naimacimo llotiaimaiaí:

—Jusiñamui omoína duenaillana omoi jai uiñua jira, Jesús rafuena mai omoi ñno.

<sup>44</sup> Jiaie sábadoruimo ailluena comini ofidímaci, Jusiñamui uaina cacareillena. <sup>45</sup> Ailluena cominina ciuano, judúuai comini dinena eo uradoidímaci. Pablo joreñona ñaitímaci. Naimie llofuiacinuaina uaitatímaci; <sup>46</sup> iadedi Pablo, iaimaiaí Bernabé diga, jacitaiñeno llofuetiaimaiaí:

—Omoímo Jusiñamui uaina nano lloiacadicoco. Iena jitaíñedomoí. Jusiñamui diga omoi jaca illena jitaíñedomoí. Ie jira judúuaiñedino dine jaiticoco. <sup>47</sup> Iese Jusiñamui jaie llote:

Judúuaiñedinomo ona oretaiticue, naimacimo cue rafue llollena,  
naga eniruemo ite cominimo jeacinomona jilluana llollena.

<sup>48</sup> Iena cacajano, judúuaiñedino iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci. <sup>49</sup> Nana bie eniruemo cai Nama Jesús uaina llocana jaide; <sup>50</sup> iadedi judúuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniai mameciai are soride. Illaicomini fuemo faicana uitimaci. Ie jira Pablo, iaimaiai Bernabé diga, duere finodimaci. Naimaci illanomona iaimaiaina jino dotadimaci; <sup>51</sup> iadedi jioracuai iaimaiai eillimona jaidinotiaimaiai, naimacimo ite jeacinuaina naimaci uiñollena. Ie mei Iconio railla nairaimo jaidiaimaiai; <sup>52</sup> iadedi Antioquíamo ite creyentiai eo iocire itimaci. Jusiñamui Joreño nana naimaci comecimo namatade.

## 14

*Iconiomo Pablo, iaimaiai Bernabé diga, illa rafue*

<sup>1</sup> Iconiomo judúuai ofiracomo, iaimaiai Antioquíamo jailla isoi, jaidiaimaiai, Cristo rafuena duere llotiaimaiai. Ie jira ailluena comini creyentiaina jaidimaci. Judúuai cominimona ailluena ñnotimaci. Judúuaiñede cominimona ailluena jiai ñnotimaci; <sup>2</sup> iadedi ñnoñede judúuaidi judúuaiñedinona fuemo faitimaci. Naimacimo creyentiaina tainona llotimaci; <sup>3</sup> iadedi nainomo are fiebidiaimaiai. Cai Nama facaisena jaitaiñeno llotiaimaiai. Cai Nama Jesús iaimaiaina siño rafuena finotate. Ie jira cominidi cai Nama Jesús naimacina dueruillana fididimaci; <sup>4</sup> iadedi nana comini naiena ñnoñedimaci. Comeciaina daje isoi lloisiñede. Damierie judúuai facaisena itimaci. Damierie naie iaimaiai facaisena itimaci. <sup>5</sup> Judúuaiñedinodi, judúuai diga, naimaci illaicomini diga, naie iaimaiaina duere finoacadimaci. Noficina iaimaiaina fairigiacadimaci. <sup>6</sup> Iena fidiano,

Licaoniamo ite nairaimo aisicano jaidiiaimaiai. Listra railla nairaimo jaidiiaimaiai. Derbe railla nairaimo jiai jaidiiaimaiai. Naie nairai ecimo ite eniruemo jiai jaidiiaimaiai. <sup>7</sup> Nainomo Jesús ie mare rafuena llofuetiiaimaiai.

*Listramo iaimaiaimo suilla rafue*

<sup>8</sup> Listramo damie tisitaite. Nanomona naimie iese jeicia jira, jaca macariñede. <sup>9</sup> Pablo llofuiana naimie raise cacajamona, “Jusiñamui cuena jillotarede” raillanona, tisitaitimie inote. Pablo dinena naimiemo eruaillano, naimie iinuana uiñote. <sup>10</sup> Naimiemo ado llote:

—A naidada.

Iemei daiacaida naimie macarite. <sup>11</sup> Ailluena comini Pablo finoca rafuena ciodimaci. Naimaci uaido ado cuiridimaci:

—Hiñiai isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiai sedauidimaci. <sup>12</sup> Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira. <sup>13</sup> Naie nairai nanoca nase ruica facai Júpiterna seduilla jofu ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo feaacadimaci. <sup>14</sup> Iaimaii iena ciuanona, “Comini marañede rafuena finoacade” raillano, iaimaiai iniroina cuaranotiiaimaiai. Comini motomo aisicana jaidiiaimaiai. Ado llotiiaimaiai:

<sup>15</sup> —Nabaiñiai, ¿bue ñellena cocomo iese finodomo? Jamai imadicoco. Omoi isoidicoco. Jusiñamuina omoi sedallena, jamai rana omoi sedañellena, mare rafuena omoimo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina

jiai finode. Nana nainomo ite rana jiai finode. <sup>16</sup> Jaie Jusiñamuidi nana omoi judíuáiñedino omoi jitailla rafuena finuana rairuiñede; <sup>17</sup> iadedi naimie finoca rafuena naimiena uiñoredomoi. Omoi facaina mare rafue naimie finocabide. Noci deitate. Omoi riará sicotate. Omoimo guille itatate. Iemona omoi comeciaina caimare itatate. Iemona Jusiñamuina uiñoredomoi.

<sup>18</sup> Iese Pablo llote; iadedi iaimaiaimo juraretaiaina fecajana jaca fainonocaiacaiñedimaci. <sup>19</sup> Nano nigarui illamona, Pisidiamo ite Antioquíamona judíuái comini bitimaci. Iconiomona jiai bitimaci. Judíuái dinena fuemo faiamona, naimaci díbeimo comini jaidimaci. Iemona noficido Pablona fairigite. Naie nairaimona naimiena sonocana uitimaci, fiodaitimiena naimie eruaila jira. <sup>20</sup> Naimiena iese fainonocaila mei, creyentiai naimie ecimo billamona, naimie a naidadate. Nai nairaimo abido jaide. Ie are Derbemo, Bernabé díga, jaide. <sup>21</sup> Naie nairaimo Jesús ie mare rafuena llotíiaimaiai. Díga comini creyentiaina jaidimaci. Ie mei Listramo abido jaidíiaimaiai. Iconiomo abido jiai jaidíiaimaiai. Pisidiamo ite Antioquíamo jiai abido jaidíiaimaiai. <sup>22</sup> Creyentiai comeciaina ocuiñotadíiaimaiai. Cristona nia ínuana llotíiaimaiai. Raitíiaimaiai:

—Jusiñamui dine cai nia riñenia, eo duere sefuiticai.

<sup>23</sup> Naga creyentiai illanomo creyentiaina sedarainina fetodíiaimaiai. Guiñeno Jusiñamuimo jíia mei, guiñena facaise mei, naimiena naimaci jai ínua jira, cai Nama illa anamo naimacina fainonocaidíiaimaiai.

*Siriamo ite Antioquíamo abido jaidíiaimaiai*

<sup>24</sup> Pisidiamo jaillanona, Panfiliamo ridíiaimaiai. <sup>25</sup> Pergemo Cristo uaina llua mei, Ataliamo jaidíiaimaiai. <sup>26</sup> Nainomona botedo Siriamo ite Antioquíamo abido ridíiaimaiai. Nano naie íaimaiai illanomo abido ridíiaimaiai. Nainomona íaimaiai navui nia jaíñenia,



creyentiai dinena Jusiñamui iaimaiaina duenaillana uñuamona, iaimaiaina oredimaci. Jusiñamui rafuena iaimaii lollena, iaimaiaina oredimaci. Naie maijia fuilla jira, jai abido bitiiaimaii. <sup>27</sup> Iaimaii rilla mei, creyentiaina ofitaii iaimaii. Nana Jusiñamui iaimaiimo finoca rafuena llotii iaimaii.

—Jusiñamuidi judíuaiñedino naimiena iñuana jai jitaide —llotii iaimaii. <sup>28</sup> Dinomo creyentiai diga are itii iaimaii.

## 15

*Jerusalémo Moisés micori* llogacinona siadua rafue

<sup>1</sup> Antioquíamo Jerusalémona janore comini billano, creyentiaina iese llofuetimaci:

—Moisés micori caimo lua isoi, omoi abina omoi detatañenia, jeacinomona jillobiñeitomoi.

<sup>2</sup> Ie jira creyentiai uri iñedimaci. Pablo, iaimaii Bernabé diga, Jerusalémona bitino llofuiana eo uaitatii iaimaii. Ie muidona creyentiai dinena iaimaiaina, jiaie creyentiai diga, Jerusalémo jaillena fetodimaci. Cristo oretagano diga, Jerusalémo ite creyentiaina sedaraini diga, bie rafuena siadoi acasite. <sup>3</sup> Creyentiai naimacina oretaja mei, Fenicia railla enirue díbeido jaidimaci. Ie mei Samaria railla enirue díbeido jiai jaidimaci. Creyentiai illanuaimo llofuecana jaidimaci. Judíuaiñedino creyentiaina jai jaillana naimacimo jiai llotimaci. Ie jira naie creyentiai caimare itimaci.

<sup>4</sup> Jerusalémo ria, creyentiaidi naimacina feiñotimaci. Cristo oretagano itimaci. Creyentiaina sedaraini jiai itimaci. Naimacimo nana Jusiñamui iaimaiimo finoca rafuena llotii iaimaii. Cristo rafuena iaimaii llofuiamona, judíuaiñedino Cristona iñuana llotii iaimaii. <sup>5</sup> Iena caca-jano, fariseuai díbeimo ite creyentiaimona jiaino naidaita raitimaci:

—Moisés micori llogacinuaina iinuamona, judúuaiñede creyentiai abina diana jitaídicaí.

<sup>6</sup> Bie rafuena siadollena, Cristo oretaganodi, creyentiai sedaraini diga, danomo ofidimaci. <sup>7</sup> Iena are siadua mei, Pedro naidacaillano, raite:

—Amatiai, judúuaiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona iñnotimaci. <sup>8</sup> Nana comini comeciaina naimie uiñuamona, judúuaiñedino naimiena iñnuana Jusiñamuidi uiñote. Caimo fecaja isoi, ie Joreño naimacimo fecaja jira, Jusiñamuidi judúuaiñedinona jitaillana jai uiñoticaí.

<sup>9</sup> Jusiñamuidi naimacina cai isoi jai feiñote. Naimiena naimaci iñnua jira, naimie naimaci comeciaimona jeacinona jai dotade. <sup>10</sup> ¿Bue ñellena Jusiñamuina iñnoiacaíñedomoi? Jusiñamui jitaillacino omoi finoacaiñena jira, naimie omoína duere finuana jitaídomoi. Cai jaiagai Moisés micori llogacinodo jaidimaci; iadedi iena raise iñnoñedimaci. Nana ie llogacinona jaca finonidimaci. Iedo jaie jiai jaidicaí; iadedi iena jiai finonidicaí. ¿Bue ñellena iedo birui cai jaillana jitaídomoi? <sup>11</sup> Jesucristo caina duenaila jira, cai jeacinomona jilloiticaí. Judúuaiñedino cai isoi jilloitimaci.

<sup>12</sup> Iena cacajano, nana ofidino uai lliicaidimaci. Iemei Bernabé lluana cacadimaci. Pablo lluana jiai cacadimaci.

—Jusiñamui judúuaiñedino motomo cocona siño rafuena finotate —lloñiaímaiaí.

<sup>13</sup> Iaímaiaí ñaía mei, Jacobo raite:

<sup>14</sup> —Amatiai, cuemo cacarei. Judúuaiñedinomo Jesús rafue Simón Pedro nano llua rafuena jai cacadicaí. Creyentiaína naimaci jaillena, Jusiñamui naimacina jai fetode.

<sup>15</sup> Jusiñamui facaina lloraini micoriaí iena jaie cuetimaci:

<sup>16-18</sup> Jusiñamui jaie llote: “David micori illaíma isoi illaímana illena, cue Jitona ico oretaiticue.

David jicori jito illaimana birui iñede;  
 iadedi David micori ifomo illaimana cue Jito iite.  
 Iemona judúuaiñedino cuena iñoitimaci.  
 Naimaci cue cominina jaillena jiai jitaidicue.  
 Iena cue llua jira, iena finoiticue” llote.

<sup>19</sup> Ie muidona cue comeci raite: Judúuaiñedinomona creyentiaina jaidinona duere finoñeiticai. <sup>20</sup> Naimacimo rabena oreta, dama biena llollena: “Jiraraimo fecaca llicisina riñeno. O aiñede riño diga iñeno. O iniñede iima diga iñeno. Llerinoga rana riñeno. Diruena jiai riñeno”.

<sup>21</sup> Jaiemona naga sábado naga judúuai ofiracomo judúuaidi Moisés micori ciegafuiaimona naie isoide lletarafuena cacadimaci. Ie jira naie isoide rafuedo nia jaiticai: iadedi jiaie Moisés micori lletarafuedo jaiñeiticai.

<sup>22</sup> Ie mei Cristo oretaganodi, creyentiaina sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiai comeciaina facajano: “Jee” raitimaci. Pablo, iaimaiai Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiai fetodimaci. Jiaie comini baifemo rafuena baitadiiaimaiai.

<sup>23</sup> Rabena cuetimaci, iaimaiai diga oretallena. Iese rail-lano, cuetimaci:

“Antioquíamo itino, Siriamo itino, Ciliciamo itino, omoimo cueticai. Jerusalémo iticai. Cristo oretaganodicai. Creyentiaina sedarainidicai. Omoidi cai amatiai. Omoimo jai cueticai. Judúuaiñediomoi; iadedi cai amatiaidomoi. <sup>24</sup> Cai motomona jiaie comini naimaci llofuiado omoina uri itatañenana fididicai. Omoi jeacinomona omoi jilloillena, Moisés micori llogacinodo omoi jaillana jitaidimaci. Ie jirari omoi comeciai ru-caicuerite. Naimacina oretañedicai. <sup>25</sup> Danomo cai ofilla mei, menamiena fetodicai, omoimo oretallena, Bernabé, iaimaiai Pablo diga. Bernabéna isiruiticai. Pablona jiai

isiriticai. <sup>26</sup> Iaimai ai Nama Jesucristo muidona navui niadedi fiodaitiiaimai. <sup>27</sup> Ie jira Judas, iaimai Silas diga, oretaiticai. Omoimo bie rabe cuia isoi lloitiiaimai. <sup>28</sup> Jusiñamui Joreño caimo illamona, bie rafuena omoimo lloiticai. Ailluena rafue omoi finuana lloñeiticai. Dani bie rafuena finojitomoi. <sup>29</sup> Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno. Iese omoi iñenia, marena iitomoi. Macaibaite” cuetimaci.

<sup>30</sup> Ie mei Antioquíamo jaidimaci. Ailluena cominina ofitaja mei, naimacimo cartana fecadimaci. <sup>31</sup> Iena facajano, naie llucacimori iobidimaci. <sup>32</sup> Judas Jusiñamui facaina lloraima. Silas daje isoide. Diga rafuena creyentiaimo llofuetiiaimai. Naimaci comeciaina jiai ocuiñotadiiaimai. <sup>33</sup> Diga irui nainomo illa mei, iaimaiaina oretatinomo creyentia iaimaiaina marena abido oretatimaci.

<sup>34</sup> Nainomo Silas comecina facajano, fiebide. Ie jira Judas dama abido jaide. <sup>35</sup> Antioquíamo Pablo, iaimai Bernabé diga, ai Nama Jesús rafuena llofuellena fiebidiaimai. Diga comini jiai iese llofuetimaci.

*Pablo* jiaie eniruemo ite creyentia dine dane jailla rafue

<sup>36</sup> Diga irui illa mei, Pablo Bernabémo llote: p —Naga navui coco llua nairaimo creyentia dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

<sup>37</sup> Bernabédi, naie iaimai diga, Juan Marcos uiacade. <sup>38</sup> Panfiliamo iaimaiaina navui Juan fañonocade. Iaimai diga llofuellena jaiñena jira, Pablo naimiaina dane uiacañede. <sup>39</sup> Riire ñaitiiaimai. Comecina daje isoi lloñediiaimai. Ie jira dajena jaiñediiaimai. Bernabé Juan Marcona uillanona, Chipremo aillue botedo

jaidiiaimaia. <sup>40</sup> Ie mei Pablo Silana uite. “Jusiñamui omicono canoite” creyentiai dinena raillanona, iaiaiaina oredimaci. <sup>41</sup> Siria railla eniruemo Jesús rafuena llocana jaidiiaimaia. Cilicia railla eniruemo jiai llocana jaidiiaimaia. Creyentiai comeciaina ocuiñotacana jaidiiaimaia.

## 16

### *Timoteo iaiaiaia diga jailla rafue*

<sup>1</sup> Nano Derbemo Pablo, iaiaiaia Silas diga, ridiiaimaia. Iemona Listramo ridiiaimaia. Nainomo Timoteo railla creyente ite. Naimie eidi judía iñaño. Jiai creyente. Ie moo micoridi griego imie. <sup>2</sup> Listramo ite creyentiai, Iconiomo ite creyentiai diga, naimiena: “Mare” raitimaci. <sup>3</sup> Pablodi Timoteona uiacade, naimie diga jaillena. Timoteo moo micori griego imiena jira, naimie abina nia detatañede; iadedi nainomo ite judíuai illa jira, Moisés micori lua isoi, Pablo Timoteo ie abina dete. Judíuñedimie naimaci motomo ia, naimaci motomo inide. <sup>4</sup> Naga nairaímo naimaci jaillanona, Jerusalémo siadogacinona creyentiaímo llote. Jerusalémo Cristo oretagano, creyentiaína sedaraini diga, navui naicinona siadotimaci. Creyentiai naie lluaña inollena, iena llocana jaidimaci. <sup>5</sup> Ie jira creyentiai inocana jaidimaci. Nagarui ailluena comini creyentiaína jaidimaci.

### *Pablo nicairilla ra isoidena ciua rafue*

<sup>6</sup> Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci. <sup>7</sup> Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide. <sup>8</sup> Ie jira Misiamona ecido jaillano, Troas railla nairaímo jaidimaci. <sup>9</sup> Nainomo

naie naiona Pablo nicairilla ra isoidena ciode. Daje Macedonia imiedi uicomo naidaita naimiemo jica-jicanode. Raite: “Macedoniamu ruica o bi. Caina canuaibi”.<sup>10</sup> Naiona Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uiñoticue, iena omo cuellena. Macedoniamu ruica dine cai jaille botena jenodicai. Comecina facadicai: “Jusiñamuidi caina uaidote, nainomo ie mare rafuena cai lollena”.

### *Filipomo illa rafue*

<sup>11</sup> Ie jira Troamona Samotraciamu monaillaido atona ie mamedo jaidicai. Ie icoitidiruido Neápolis railla nairaimo ridicai. <sup>12</sup> Dinomona Filipomo duide naisodo jaidicai. Macedoniamu ite. Naie enirue facaise ie nanoca nairai Filipo. Naie nairaidi Romamona bitino nairai. Diga irui nainomo iticai. <sup>13</sup> Sábadoruido naie nairaimona nasedo jino jaidicai. Comecina facajamona: “Dinomo nibai comini oficabidimaci, Jusiñamuimo jüllena”, ille fuemo jaidicai. Nainomo dañaiñorie riñoniai billanona, dinomo ana raidicai, naiñaiñuaimo Cristo rafuena lollena. <sup>14</sup> Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruenta fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie lluaña feiñotade. Naie facaise creyentena jaide. <sup>15</sup> Naiñaiño ie jofomo itino diga bautizaja mei, caimo llote:

—Cuedi cai Namana cue jai iñuana omoi uiñuamona, cue jofomo mai bi, nainomo omoi fiebillesa. —Duere caina uai-uaidode.

<sup>16</sup> Jusiñamuimo jiranomo jairuido jaidicaimo, daje jitaiñonomo dafaidicai. Naiñaiñodi jainomona ibacañaiño. Janaba anamo naiñaiño jiai ite. Iemona naiñaiño jairuido sulle rafuena llouide. Naie rafuena lluaña ibatajano, naiñaiño namaiaidi ailluena ucubena

feñouidimaci. <sup>17</sup> Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

<sup>18</sup> Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. — Iemona oni jaide.

<sup>19</sup> Naiñaiño llumona ucubena jai oñenana naiñaiño namaiai jai uiñua jira, Pablo, iaïmaiai Silas diga, gaitadimaci. Iaïmaiaïna plazamo illaïcomini illanomo sonocana uitimaci. <sup>20</sup> Dinomo iaïmaiaïna illaïcomini dine atidimaci. Iese iaïmaiaïna llogidotimaci:

—Naie iaïmaiaïdi cai nairaina uri itatañediïmaiaï. Iaïmaiaï judíuai comini. <sup>21</sup> Romanuai cominina cai illa jira, iaïmaiaï llogacinuaina cai iinoia, iedo cai jaia, marañede.

<sup>22</sup> Iena cacajano, nana comini naie iaïmaiaïna fanaisitimaci. Illaïcominidi naie iaïmaiaï iniroina cuaranuanona duiñode. Rasi diga, iaïmaiaïna diga icaïño fatatatimaci. <sup>23</sup> Iaïmaiaïna eo faja mei, cárcelmo jonetimaci. Cárcelna sedaraimamo iaïmaiaïna raise sedallena llotimaci. <sup>24</sup> Iese llua jira, iaïmaiaïna llaveracomo fo iaïmaiaïna uite. Donoramo iaïmaiaï eilliaï ñuitajano, raise donode.

<sup>25</sup> Naïona daferui facai Pablo, iaïmaiaï Silas diga, Jusiñamuimo ifuerillacinona ro-rodiaïmaiaï. Jiaï jiidiaïmaiaï. Jiaïe llavecano naïena cacadimaci. <sup>26</sup> Jamaï ebena il-lacinomona ñuisañodi suide. Cárcel illanodi jaidisite. Naie facaiseconi nana nasiaïdi ecocorinaite. Ie dacaïño nana llavecano imaci donua radi oni ecoride. <sup>27</sup> Cárcelna sedaraima casidemo, cárcel ie nasiaï ecocorinaïllana ciode. “Llavecano jai aisidimaci” raillamo naimie começina facade. Ie jira ie lloesi aiñoicaïda, dama abi

faitaacade. “Illaicomini bia, ¿bue lloiticue?” raillamona comecina facade; <sup>28</sup> iadedi Pablodi eo riire cuirioide:

—¡O abina dama meineño! Bene nana iticaisa.

<sup>29</sup> Lamparína atillena cárcelna sedaraíma jicajanona, jarire fo jaide, Pablo iaimaiaí Silas dine. Jacinaillano, naimie abidi docaillamona, iaimaiaí uicomo cañici ifodo ana rainadate. <sup>30</sup> Iaimaiaína jino ua mei, nai iaimaiaímo jicanote:

—¿Buena finojiticue, cue jecinomona cue jilloillena?

<sup>31</sup> Uai otiaimaiaí:

—Coco Nama Jesúna iino. Iese na o jofomo ite comini diga o jilloillesa.

<sup>32</sup> Iemei naimiena Jesús ie rafuena llofuetiaimaiaí, nana ie jofomo itino diga. <sup>33</sup> Naie facaise iaimaiaí bofel-lañona jocode. Iemei naimiedi, nana ie comini diga, bautizaga. <sup>34</sup> Guillena, ie jofomo naie iaimaiaína uite. Jusiñamuina jai iinua jira, na ie comini diga, naimie caimare ite.

<sup>35</sup> Ie oni monaidemo, illaicominidi dajerie policiana cárcelmo oretatimaci, nai iaimaiaína jino orellena.

<sup>36</sup> Cárcel sedaraímadi naie rafuena Pablomo llote. Raite:

—Omico jaillena, illaicominidi omicono oredimaci. Mai marena jai.

<sup>37</sup> Iadedi policíamo Pablodi llote:

—Cocodi romanuai cominidicoco; iadedi cocomo ite rafuena raise uiñoño cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bí”.

<sup>38</sup> Illaicominimo policías naiena lluaibitemo, illaicominidi naiena cacajanona, eo jacinaita, romanuai cominina iaimaiaína jira. Cai nanoca illaicominidi romanuai nairai cominina jamai ebena duere finuana rairuidimaci. <sup>39</sup> Ie jira naie iaimaiaí dine illaicominidi



jaidimaci, iaimaiaina: “Dama dino iesede” raillena. Jino atia mei, nairaimona jino iaimaii jaillena oredimaci. <sup>40</sup> Cárcelmona jino billano, Lidia jofomo fo jaidiiaimaii. Creyentiaina ciuano, naimaci comeciaina ocuiñotallena, naimacina dane llofuetiiaimaii. Ie mei oni jaidiiaimaii.

## 17

*Pablo, iaimaii* Silas diga, Tesalónicamo illa rafue

<sup>1</sup> Anfípolis railla nairaimo macaritiiaimaii. Apolonia railla nairaimo macaritiiaimaii. Ie mei Tesalónica railla nairaimo ridiiaimaii. Dinomo judíuai ofiracodi ite. <sup>2</sup> Pablo fibilla isoi, nainomo fo jaide. Daje amani sábadoruimo Jusiñamuina cuegafuiaimona naimacina llofuate. <sup>3</sup> Iese naimacina llofuate:

—Cristo llogi cacaite. Fiodaillamona naimie jilloite. Naimiedi Jesús. <sup>4</sup> Naiena cacadinomona ailluena inotimaci. Pablo, Silas iaimaii dibeimo jaidimaci. Jusiñamuina inote grieguaimona ailluena comini creyentiaina jaidimaci. Ie emodoconi ailluena nanocañaiñuaidi creyentiaina jiai jaidimaci; <sup>5</sup> iadedi judíuaidi uradoillano, jamai itinomona eo marañede iñiaina uaiduanona, ailluena cominina ofitatimaci. Ie jira naie nairai uri inedimaci. Iaimaiaina comini uicomo uillena, Jasón jofomo binaisite. <sup>6</sup> Iaimaiaina baiñenano, Jesóna, jiaie creyentiai diga, illaicomini illanomo aiñoicaida uitimaci. Cuiirisite:

—Naga nairaimo cominina uri itatañediiaimaii. Benomo jai bitiaimaii. Jai benomo billanona, Jasón ie jofomo iaimaiaina feiñote. <sup>7</sup> Cai nanoca illaima ie llogacinona jai inoñedimaci. Ie anamo jai iacaiñedimaci. Raitimaci: “Jiaie illaima anamo iticai. Jesús raillamie anamo iticai”.

<sup>8</sup> Judíuai iese lluamona, cominidi uri inedimaci. Illaicominidi jiai uri inedimaci. <sup>9</sup> “Naie iaimaii dane

biñeitiiaimaiai” illaicominiño creyentiai raillano, illaicominiði Jasón jiaie creyentiai diga, jino oretatimaci.

*Bereamo Pablo, iaimaiai Silas diga, illa rafue*

<sup>10</sup> Naie naio creyentiaidi Pablona, iaimaiai Silas diga, Bereamo raire oretatimaci. Dinomo rillano, judúuai ofiracomo jaidiaimaiai. <sup>11</sup> Nainomo ite judúuai eo mare. Tesalónicamo ite judúuai isoiñedimaci. Bereamo itinodi Cristo rafuena iocire feiñotimaci. Niedi uanaicinoni raillanona, nagarui Jusiñamuina ciegafuiaina facadimaci. <sup>12</sup> Ie jira naimacimona ailluena ñnotimaci. Judúuaiñedinomona ailluena nanocañaiñuai ñnotimaci. Ailluena ññiai jiai ñnotimaci; <sup>13</sup> iadedi Bereamo Pablo Jusiñamui ie uaina jai llwana Tesalónicamo ite judúuaidi fidiano, dinomo jaidimaci. Cominina fuemo faillena, jaidimaci. <sup>14</sup> Naie facaise creyentiaidi Pablona oni oretatimaci. Monaillai fuemo duide naisona oretatimaci. Silas, iaimaiai Timoteo diga, fiebidiiaimaiai. <sup>15</sup> Pablo uigamací naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaimaiai Timoteo diga, raire cue dine billesa” llono.

*Atenamo Pablo illa rafue*

<sup>16</sup> Atenamo iaimaiai rillena Pablo sedademo, naie nairaimo ailluena jiraraiaina ciode. Iena ciuanona, Pablo comecidi jeareficaide. <sup>17</sup> Naiena ciua mei, judúuai ofiracomo judúuai diga coniniri Jusiñamui rafuena siadote. Jusiñamuina jai ñnote judúuaiñedino diga coniniri iena jiai siadote. Plazamo nagarui jamai itino diga coniniri iena jiai siadote. <sup>18</sup> Jamai comecina facadinomona damierie naimie diga jiai ñaitimaci. Epicúreo railla rafuedo jaisoidimaci. Estoico railla rafuedo jiai jaisoidimaci. Damierie naimacimona raitimaci:

—¿Buena nai ñaillareuidimie caimo lloiacade?

Jiaino raite:

—Jiaie nairai jusiñamuillaicaimo lloiacade isoide.

Jesús fiodaillamona jilluana Pablodi llouilla jira, iese raitimaci. <sup>19</sup> Ie jira naimiena naimaci siadouillanomo uitimaci. Naie illano Areópagona mameciredede. Jicanotimaci:

—¿Nie isoide o comocinuai? Caimo llono, cai uiñollena.

<sup>20</sup> Eo feiredicinuaina cacadicaí. ¿Buena nai llofuiacinodi llote? Iena uiñoiacadicaí.

<sup>21</sup> Nana Atenamo ite comini, jiaie illanomona bitino diga, jamai ailli como imaci fidia rafuena ñai-ñaidimaci. Jamai ailli fidia rafuena caca-cacadimaci. Jiaie rafuena finoñedimaci.

<sup>22</sup> Jicanua mei, Areópago railla illanomo Pablo naidacaida llote:

—Atenas imaci, omoimo rafuena lloiacadicue. Omoi jusiñamuillaina eo sedacabidomoi. <sup>23</sup> Cue macarillamona, omoi jusiñamuillaina sedaja jiraraina ciodicue. Daje jirarai abimo iese cueda: “Uiñoñega Jusiñamuina sedadicaí” cueda. Uiñoñoeno naimiena sedadomoi. Ja omoimo naimiena lloiticue. <sup>24</sup> Jusiñamui biniena jaie finode. Ie emodoconi Jusiñamuidi nana biniemo itinona jiai finode. Naimiedi mona ie Nama. Enirue ie Nama. Ie jira iima finoca jofomo naimie iñede. <sup>25</sup> Naga jitaille rana naimiemo illa jira, naimiena canonicadicaí. Naimie nana cominina comuitate. Jiai nagarui jafaici cai uadi caimo iga. Uanai nana rana caimo iga. <sup>26</sup> Damiedemona nana cominina jebuitate, nana eniruemo naimaci illena. Naimaci illa dinori naimie jonega. Naimaci illanomo naimie jiai jonega. <sup>27</sup> Iese jonega, naimaci naimiena jenollena. Jenuano, nibai naimiena baitimaci. Caimona naimie are iñede. <sup>28</sup> Naimie jaca illa jira, cai jiai iticaí. Jiai cajedicaí. Ie isoi omoi rafue lloraini jiai llotimaci: “Naimie ie uruiaidicaí”.

<sup>29</sup> 'Naimie caina comuitaja jira, Jusiñamuidi jirarai isoiñedena uiñoticaí. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. tima ie onolli diga finoca ra isoiñede.

<sup>30</sup> Cominidi abi uiñoñoeno jeacino jaie finouidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeciai iuai meidollena jitaide. <sup>31</sup> Naimaci comeciai iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúna naimie jai jilloitaja jira, iena uiñoticaí.

<sup>32</sup> Fiodaillamona Jesús jilluana cacajano, damierie jaisitimaci. Ieconi jiaínodi raite:

—Jiaíruido o lluana dane cacajiticaí.

<sup>33</sup> Iemei naimaci motomona Pablo jino jaide. <sup>34</sup> Naie cominimona damierie naimie díbeimo jaidimaci. ñnotimaci. Naimacimona damie Areópagomo siadouidimie. Ie mamecidi Dionisio. Jiaíñaiño ñnote. Naiñaiño mamecidi Dámaris. Daje facaiseconi jiaie cominidi ñnotimaci.

## 18

### *Corintomo Pablo illa rafue*

<sup>1</sup> Atenamona Corinto railla nairaimo Pablodi jaide.

<sup>2</sup> Nainomo Aquila raillamiéna baisaide. Naimiedi judfo imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaimaiaí. Romamona Claudio nana judúuai cominina jai oretate. Ie jirari bitiaimaiaí. Roma ie nanoca illaimadi Claudio. <sup>3</sup> Pablo iaímaiaí daje isoi maijia jira, Pablo iaímaiaí jofomo fiebide. Iaímaiaí conima diga maijide. Chivos itiraiaí ie nilla ñniroina tiforisoidimaci, naiemona

jofona finollena. <sup>4</sup> Naga sábadoruimo judúuai ofiracomolofuete, judúuaina ñnotallena, judúuaiñedínona iena jiai ñnotallena. <sup>5</sup> Macedoniamona Silas, iaímaiaí Timoteo diga, bitemo, Pablodí nagarui Jusiñamui uaina llofueuide. Judúuaimo: “Jesúdí cai Jilloitaraima” llouide; <sup>6</sup> ia naimie uaina ñnosíñedimaci. Jiai naimie jinafomo jeare ñaitimaci. Naimaci comeciai jeare ciua jira, Pablo ie iniroina jaidínote, naimacina raillano:

—Dani omoi muidona Jusiñamui omoína duere finojite. Cue muidonañeite. Jai judúuaiñedíno díne jaiticue, naimacina cue llofuellena.

<sup>7</sup> Iese raillano, oni jaide. Justo jofomo jaide. Naimiedi Jusiñamuina ñnouidímie. Ie jofó judúuai ofiraco ecimo ite. <sup>8</sup> Crispodí, nana ie jofomo itino diga, cai Nama Cristona ñnote. Naimiedi judúuai ofiraco ie sedaraima. Ailluena Corintomo ite comíni creyentiaina jaidimaci. Ie mei naimacídí bautizaga. <sup>9</sup> Daje naiona Pablo nicairilla isoidemona, Pablomo cai Nama Jesucristodí llote:

—Mai jaciruiñeno. Faicaiñeno cue rafuena llocana jai. <sup>10</sup> O diga iiticue. Budí ona maraiñeno finoñeite. Bie nairaimo ailluena comínidí cue díbeimo jaitimaci.

<sup>11</sup> Ie jira daje año ie emodo seis fívuí dínomo Pablodí fiebide, naimacimo Jusiñamui uaina llofuellena.

<sup>12</sup> Corinto railla nairaidí Acaya railla eniruemo jainaiáide. Naie facaise Acaya ie gobernardodí Galión. Naie facaiseconi damierie judúuai comíni Pablona faiacadimaci. Galión díne naimiena uitimaci. <sup>13</sup> Raitimaci:

—Cai illaima llogacino isoi bimiedi comínina Jusiñamuina sedallena llofueñede.

<sup>14</sup> Pablo uai oiacademo, judúuaimo Galióndí llote:

—Judúuai, cacarei. Naimie maraiñede rafuena finodena, naimie omoína jifuetena, omoi lluomo nia cacarefidicue; <sup>15</sup> iadedí jamai naimie uaillai cuemo llotomoi. Omoi usumatiaí micoriaí nameciaí cuemo jiai llotomoi.

Omoi einamací llogacinuaina cuemo jiai llotomoi. Iena omoi coniniri siadotomoi. Bie isoide rafuena siadoia-caiñedicue.

<sup>16</sup> Iemona naimiedi nainomona naimacina oni orede.

<sup>17</sup> Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibaiñede.

*Antioquíamo Pablo abido jailla rafue*

<sup>18</sup> Naifue suilla mei, nainomo Pablo are fiebide. Ie mei creyentiaina facaduano, Priscila iaímaiaí Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate. <sup>19</sup> Efesomo rillanona, iaímaiaina fainonocaide. Judíuaí comini Jusiñamui rafuena siadol-lena, Pablodi judíuaí ofiracomo fo jaide. <sup>20</sup> Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue — <sup>21</sup> Naimacina facaduano, llote — . Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide.

<sup>22</sup> Cesareamo sijiano, Jerusalémo macarite. Creyentiaí dine jaide. Ie mei Antioquíamo jiai macarite.

<sup>23</sup> Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiaí imaci comeciaina ocuiñotacana jaide.

*Apolos illa rafue*

<sup>24</sup> Ie facaise Efesomo Apolos raillamie Alejandría railla nairaimona ride. Judío imie. Naimie eo raise llo-fueuidimie. Naimiedi Jusiñamui facaina lloraini micoriaí cuegafuiaí raise uiñote. <sup>25</sup> Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofuate; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiai uiñoñede.

<sup>26</sup> Judíuái ofiracomo naimie llofuia, jacitaiñeno llofuate. Priscila, iaímaiaí Aquila díga, naiena cacadiímaiaí. Ie jira naimiena oni eneno uitíiaímaiaí. Ie uiñoñega rafuena eo raise naimiena llofuetíiaímaiaí. <sup>27</sup> Acayamo Apolodí jaiacana jira, creyentiaídí naimie comecina ocuiñotajano, naimiena oresite. Acayamo ite creyentiaímo rabemo cuetímaci. Jusiñamui naimacina dueruilla jira, creyentiaína jai jaidímaci. Naimiena marena feiñollena iese cuetímaci. Nainomo naimie rillanona, creyentiaína eo canode. <sup>28</sup> Judíuái díga marefodo jiaí eo ñaíte. Iemona naimaci uai ollínodi íñede. Naimiedí Jusiñamui cuela-fuíaímona Jesúdí cai Jilloitaraimana llofuate.

## 19

### *Efesomo Pablo illa rafue*

<sup>1</sup> Corintomo Apolo nia ítemo, nairaíai onifedo joide naido jailla mei, Pablo Efesomo ride. Dinomo rillanona, creyentiaína baíte. <sup>2</sup> Naimacímó jicanote:

—¿Cristona omoí ñnuaruimo Jusiñamui Joreñaona feiñotomoi?

Uai otímaci:

—Jusiñamui Joreñaona nia jaca cacaiñedicai.

<sup>3</sup> Dane jicanote:

—¿Ñie isoi omoí bautizagaomoi?

Uai otímaci:

—Juan micori lloga rafue facaina bautizagacai.

<sup>4</sup> Pablo uai ote:

—Mare. Juan llote: “Omoí comeciaí iuaina meido. Iemei bautizallomoi”. Ie ifo meidoitímiena comini ñnollena llote. Jesúna ñnollena llote. Jesús rafuena omoímó raise lloíticue.

<sup>5</sup> Iena cacajano, cai Nama Jesús díbeido bautizadímaci.

<sup>6</sup> Naimacímó Pablo ie onollína joniamona, Jusiñamui Joreñaona feiñotímaci. Ie mei naimaci uiñoñega nairai

uaido ñaitimaci. Jusiñamui Joreño naimacimo llua rafuena jiai llotimaci. <sup>7</sup> Nibai nana naimacidi doce iññiai.

<sup>8</sup> Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui dibeimo naimaci comeciai uaina meiduana Pablodi jacítaiñeno eo llouide. Nainomo daje amani fivui fiebide.

<sup>9</sup> Naimacimona jiaínodi Pablo uaina uaitatimaci. Jiai iñnoiacañedimaci. Naimaci iññoñena ira, ofiracomo bitinomo: “Cristo rafuedi maraiñede” llouidimaci. Ie jira Pablodi creyentiai diga naimacimona eneno oni jaide. Tiranno ie lloracomo nagarui Pablodi llofueuide. <sup>10</sup> Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

<sup>11</sup> Jusiñamuidi Pablona siño rafuena finotate. <sup>12</sup> Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodi jillodimaci. Janaba anamo itinodi jiai jillodimaci. <sup>13</sup> Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

—Pablo llua isoi, Jesús muidona bimacimona oni jai.

<sup>14</sup> Esceva ie siete jitotiaidi iese finoacadimaci. Esceva Jusiñamui diga ñairaima. <sup>15</sup> Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

<sup>16</sup> Ieconí Janaba anamo itimie naimaci emodomo daia-caide. Riire nana naimacina emodoficaide. Ie jira naie jofomona taimiaina jino aisidimaci. Naimacidi bofellaiai diga jino aisidimaci.

<sup>17</sup> Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena



fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci. <sup>18</sup> Ie jira ailluena creyentiaidi billano, imaci navui maraiñede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci. <sup>19</sup> Ailluena icorilla rafuai illabiai atianona, marefodo jobaidimaci. Niga raifi rabiai jobaillana facadimaci. Cincuenta mil ucube diese facai rabiaina jobaidimaci. <sup>20</sup> Cai Nama Jesús uaina eo llocana jaide. Cominidi naie uai siñonana uiñotimaci.

<sup>21</sup> Naie rafue illa mei, Pablodi comecina facajano raite: “Macedoniamos cue macarillamona, Acayamos cue jiai macarillamona, Jerusalémo riacadicue”. Ie emodoconi naimiedi raite: “Nainomona Romamos jiai jaiacadicue”. <sup>22</sup> Naimie nia Asiamos nano nigarui illanona, mena canoraimana Macedoniamos oretate. Timoteona, iaiaia Erasto diga, oretate.

### *Efesomos ite comini maraiñede rafue finoacadimaci*

<sup>23</sup> Naie facaiseconos Pablo nia oni jaiñenia, Jesucristo rafue muidona Efesomos ite cominidi maraiñede rafuena comuitatimaci. <sup>24</sup> Demetrios raillamie platamona diga rana finouide. Naimiedi Diana ie joforeñuaina finouide. Naimie anamos ailluena maijiuidimaci. Dianadi naimaci jusiñamui. <sup>25</sup> Naimie isoi maijiuidinona Demetrios uaidote, nana naimaci danomos ofillena. Ie mei raite:

—Jai danomos ofidicai. Bie maijiamona cai ucubena uana raise uiñotomoi; <sup>26</sup> iadedi Pablo raillamiedi diga cominina jai llofuate: “Comini finoca raniadi jusiñamuillañede”. Naie llofuiamona ailluena comini naimie dibeimo jaidimaci. Dama Efesomos iese suiñede; iadedi ua nana Asiamos iese suide. <sup>27</sup> Ie jira abina rairuiacadicai, cai maijille faifi raillano, comini Diana jofona jiai sofei raillanona. Cominidi naiñaiñona ebiuillana feittaitimaci.

Naiñaiñori rajicaiñeitimaci. Dianadi eo ebirede jusiñamui. Nana Asiamo ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuiacadicaí.

<sup>28</sup> Iena cacajano, eo iciritimaci. Riire cuiroidimaci:

—¡Efeso ie Diana eo ebirede!

<sup>29</sup> Danirie siadumona, nana comini eo failliñaidimaci. Iemo nana comini dajena naimaci ofiracomo fo raire jaisite. Gayona, iaimaiai Aristarco diga, gaitajano uitimaci. Naie iaimaiaidi Pablo ie nabai iaimaiai. Iaimaiai comuillanodi Macedonia. <sup>30</sup> Pablo ofiracomo jiai fo jaiacade; iadedi creyentiaidi naimie fo jaillana rairuidimaci. <sup>31</sup> Ilaicomini mona damierie nabaiñiai naimiemo fo jailana jiai rairuidimaci. <sup>32</sup> Fo itinomona damierie daje rafuena ebena cuiroidimaci. Jiaino jiaifuena ebena cuiroidimaci. Eo failliñaidimaci; ie iadedi bue ñellena naimaci ofillana raise uiñoñedimaci. <sup>33</sup> Comini motomona judúuai dinena damie uicomo oredimaci. Ie mamecidi Alejandro. Cominina lliicaitallena, ie onolli jaidianona, cominimo lloiacade; <sup>34</sup> iadedi naimie judfo imiena naimaci uiñuanona, nana daacaiño cuiroidimaci. Mena horas raifi cuiroi-cuiroidimaci:

—¡Efeso ie Diana eo ebirede!

<sup>35</sup> Iemei naie nairai rabe cueraimadi cominina lliicaitatate. Naimaci lliicailla meinoconi, naimie lluacinona cacadimaci. Raite:

—¡Cacarei! Cai nairaidi Dianana sedacabidicaí. Naiñaiño ebirediñaiño. Naiñaiñona eruai de jiraraidi monamona jaie uaide. Iena jiai sedacabidicaí. Nana bie eniruemo ite comini iena uiñotimaci. Bu naiena uiñoñediñiena jaca iñede. <sup>36</sup> Bu cue lluana jaca uaitañeite. Ie jira omoi lliicai. Comeciai facañeno buena fiñoño. <sup>37</sup> ¿Bue ñellena Gayo iaimaiai Aristarco diga, benomo atidomoi? Iaimaiaidi cai jusiñamui joreñoña ñaiñediñaimaiai. Naiñaiñona jeare fiñoñediñaimaiai.

<sup>38</sup> Demetrio, ie maijiraini diga, iaimaiaina llogidoiacania, cominina llogidoraco ite. Diga jueces jiai ite. Coniniri nainomo iena siado; <sup>39</sup> iadedi jiai nicino omoimo ia, cai illaicomini ofia, biena siaduano, caimo lloitimaci. <sup>40</sup> Birui bie rafue cai finua jira, illaicomini nibai caina duere finoitimaci. ¿Niese cai nibaille? Illaicomini caimo biena jicanoia, ¿niese raiticai?

<sup>41</sup> Naie llua mei, ofidinona jino orede. Iemei jai jono tuudimaci.

## 20

### *Macedoniamo Pablo dane jailla rafue*

<sup>1</sup> Efesomo ite rafue suilla mei, Pablodi creyentiaina uaidote. Naimaci comeciaina ocuinotafuena llote. Iemei naimacina naimie facaduano, Macedonia railla eniruemo jaide. <sup>2</sup> Nainomo ite nairaiimo macarite. Comecina ocuinotallena, naimacina llofuecana jaide. Iese Macedoniamona Grecia railla eniruemo risaide. <sup>3</sup> Nainomo daje amani fivui illa mei, Siriamo botedo abido jaiacade; iadedi judiuaidi naimiena meineiacanana Pablo fidiano, Macedoniamo abido macarite. <sup>4</sup> Jiaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaimaiai Segundo diga, jaide. Tesalónica nairai imie iaimaiai. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaimaiai Trófimo diga, jiai jaidiiaimaiai. Asia imie iaimaiai. <sup>5</sup> Coco uicodo naimaci jaillano, Troamo cocona sedadimaci. <sup>6</sup> Llomenico guillaruillai railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

### *Troamo Pablo illa rafue*

<sup>7</sup> Domingoruimo Jesús fiodaillana começillena, danomo ofidicaimo, Pablodì caina llofujete. Icoitì naimie jaiacana jira, Pablo are ñaite. Naiona jitoma daferui illa facai nia ñaite. <sup>8</sup> Cai ofillanomo ailluena lamparíniai ite. <sup>9</sup> Pablo are ñaia jira, daje coniruemo iniaicidì suide. Naie conirue mamecidì Eutico. Naimiedì ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedì uaide. Ana jibuisaibidemo, naimiena meniñocaidemo, naimie jai fiodaillana ciodimaci. <sup>10</sup> Ie jira Pablo ana jaide. Naimie emodomo jítadacaida, naimiena meniñote. Cominimo llote:

—Omoi rucaicueriñeno. Naimie cajede. Jafaicina nia faite.

<sup>11</sup> Abido a jaidimaci. Jesús fiodaillana começillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide. <sup>12</sup> Nainomona conirue jai cajede uitimaci. Ie jira nana naimaci naimieri eo iobidimaci.

### *Mileto railla nairaimo Pablo jailla rafue*

<sup>13</sup> Pablodì Troamona Asón railla nairaimo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicai. <sup>14</sup> Ie jira Asónmo naimiena cai baillanona, cai diga botemo bite. Ie mei Mitilene railla nairaimo jaidicai. <sup>15</sup> Nainomona dane monaillaído cai jaillano, ie areruido Quío railla nairaimo ruicafebellemo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai. <sup>16</sup> Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. Asia railla eniruemo naimie

are iacaiñena jira, Pablo comecina facade: “Efeso ecido monaillaido jaiticai”.

*Efesomo ite creyentiai* sedarainimo Pablo llua rafue

<sup>17</sup> Creyentiaina sedarainina uaidollena, Miletomona Efesomo Pablo cartana orede. <sup>18</sup> Naimie dine naimaci rillanona, Pablo naimacimo llote:

—Asiamo nano cue rillaruimona, niese omoi diga nararui cue illana uiñotomoi. <sup>19</sup> Cai Nama diga abina iedoñoeno maijiuidicue. Eecana sure maijidicue. Judúuai cuena duere uiñodosia jira, ie facaiseconi dueredicue. <sup>20</sup> Cuemo ite marecinona omoimo jaca janoñedicue. Nana Jusiñamui rafuena omoimo jai lloticue. Omoi ofillanomo omoina llofueuidicue. Omoi jofuemo omoina jiai llofueuidicue. <sup>21</sup> Judúuaina llofueticue. Judúuaiñedinona daje isoi llofueticue. Jusiñamui dibeimo omoi comečiai iuaina meiduanana lloticue. Cai Nama Jesúna omoi iñuana jiai lloticue. <sup>22</sup> Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue; <sup>23</sup> iadedi Jusiñamui Joreño naga nairaimo cuemo llote: “Llaveracomo ona gaitajano ona jonesiite. Duere sefuitio”. <sup>24</sup> Cue ille dinori are illemo comecina facañedicue. Dama cue ille dinori fuidoiacadicue. Cai Nama Jesúmona cue feiñoga maijiana fuidoiacadicue. Mare rafuena omoimo lloiacadicue. Jusiñamui omoina duenaillana jiai lloticue. <sup>25</sup> Jusiñamui anamo omoi illa rafuena omoimo jai lloticue. Jai dane cue uiecona cioiñeitomoi. Iena uiñoticue. <sup>26-27</sup> Cue uaina jaca janoñedicue; ia nana Jusiñamui uai omoimo lloticue. Ie jira cuemona omoi diga cue começi mare. Jusiñamui uaido omoi jaiñenia, cue muidonañeite. <sup>28</sup> Mai omoi abi rairui. Jusiñamui Joreñodi omoina creyentiaina sedatate. Naimacina raise seda. Jusiñamui dibeimo itinona llofue. Naimie Jito fiodailla muidona,

naimacina ote, naimie iena. <sup>29</sup> Naimacidi toica llaudaiai isoidimaci. Nia abina raise uiñoñedimaci. Cue jailla meinocni, taino llorainidi, janallari isoi, omoimo biite. Naimaci nana omoi sedaca cominina ramo faite, danomo abido naimaci jaillena, jiconiai llaudaiai gaitaja isoi. <sup>30</sup> Omoimona uanaiñedicinona llorainidi iite. Creyentaina ramo faitimaci, omoi llucinona fainonocaillena, naimaci dibeimo illena. <sup>31</sup> Ie jira abina rairui. Bie rafuena feitaño. Daje amani fiemona nana omoina jai llofueticue. Naiona omoina llofueticue. Aremona omoina jiai llofueticue. Omoina cue duenaillamona, eianona omoina llofueticue. <sup>32</sup> Mai. Cai Nama illa anamo omoina fainonocaiticue. Naimie uaimona naimie omoina duenaillana jai uiñotomoi. Naie uaidi omoina jiai ocuiñotaite. Iemona Cristona inocana jaitomoi. Nana naimie fetocano diga naimie illanomo ico jaca iitomoi. <sup>33</sup> Jiaino ie ucubena jaca nicidoñedicue. Bu ie iniroillaina jaca jiai oiacañedicue. <sup>34</sup> Cue jitaille rana dama cue maijiano oticue. Cue diga jaidino imaci jitaille rana jiai dama cue maijiano oticue. Iena nana omoidi uiñotomoi. <sup>35</sup> Iese cue illamona omoina llofueticue. Iese maijiano duerede cominina canocana jaiacadica. Cai Nama Jesús ie llogacinona uiñotica. Naimie raite: “Raruiaina cai feiñoia, iobidica; iadedi cai eo iobiacania, jainomo raruiaina fecadica”. <sup>36</sup> Naie llua meino, naimaci diga caiñici ifodo rainadajano, Jusiñamuimo jide. <sup>37</sup> Nana naimacidi eo eedimaci. Pablona caimaduanona, naimiena llibanotimaci. <sup>38</sup> “Cuenana dana cioñeitomoi” naimacimo llua jira, eo sunaitimaci. Ieconia naimie diga botemo jaidimaci.

<sup>1</sup> Naimacina cai facadua meinoconi, suiñodícai. Cos railla nairaimo atona jaidícai. Ie are Rodas railla uiasimo ridícai. Iemei Pátara railla nairaimo ridícai. <sup>2</sup> Nainomo Fenicia railla eniruemo jaiacade botena baitícai. Nai botemo cai jailla mei, suiñodícai. <sup>3</sup> Chipre railla uiasina cai cíoja, cai nabei díbeimo ite. Iemei Siria railla eniruemo jaidícai. Tiro railla nairaimo sijidícai. Botedo uiga raruiaina nainomo joneacadimaci. <sup>4</sup> Tiromo ite creyentíai cai baillanona, siete dígarui naimaci díga itícai. Jerusalémo naimiena judíuai meineñellena, nainomo naimie jaiñellena, Jusiñamui Joreño naimacina Pablomo llotatate. <sup>5</sup> Dígarui illa meinomo oni jaidícai. Naie nairaimona nana naimaci cai díga jaidimaci. Riñoníai, naimaci uruíai díga, jaidimaci. Caiñici ifodo monaillai fuemo ana rainadajano Jusiñamuimo jiidícai. <sup>6</sup> Naimaci facadua meinoconi, botemo jaidícai. Naimaci imaci jofuemo abido jaidimaci. <sup>7</sup> Tiromona Tolemaida railla nairaimo jaidícai. Creyentiaina uaiduano, darui naimaci díga itícai. <sup>8</sup> Ie are jaillano, Cesareamo cai ria, Felipe jofomo jaidícai. Felipedi Jesucristo ie rafuena lloraima. Jerusalémo díaconuaina creyentíai jaie fetua facaise, Felipena fetodimaci. <sup>9</sup> Naimie dinomo fiebidícai. Naimiemo cuatro jisa ite. Naiñaiñuai nia iima abina uiñoñede. Jusiñamui naiñaiñuaimo lluacinona llocabitimaci.

<sup>10</sup> Dígarui nainomo cai illamo Judeamona damie bite. Naimie mamecí Agabo. Jusiñamui facaina lloraima. <sup>11</sup> Caimo ria, naimiedi Pablo cinturóna aiñode. Naie díga ie eillina maite. Ie onollina jiaí maite raillano:

—Jusiñamui Joreño raite: “Jerusalémo judíuai illaicomini bie cinturón jainaoide iimana daje isoi maitimaci. Judíuaiñedinomo naimiena fecajitimaci” raite.

<sup>12</sup> Naiena cai cacajano, naie comini díga, Pablona

caididicai, naimie Jerusalémo jaiñellena. <sup>13</sup> Pablo uai ote:  
 —¿Bue ñellena eedomoi? ¿Bue ñellena cue comecina  
 ocuiñotañedomoi? Cue maiana jaca jitaidicue. Ua cue  
 fiodaillana jaca jiai jitaidicue. Cue Nama Jesús muidona  
 cue fiodaiadedi, damamai fiodaiticue.

<sup>14</sup> Cai lloga uai naimie iinoñena muidona, raiticai:

—Cai Nama jitaille rafuena finuana jitaidicai. —Iemei  
 lliicaidicai.

<sup>15</sup> Nano nigarui illanona, cai raruiaina finuano,  
 Jerusalémo jaidicai. <sup>16</sup> Cesareamo ite creyentiaimona  
 jiaino cai diga jaidimaci. Mnasón jofomo caina uitimaci.  
 Naimiedi Chipre railla uiasi imie. Naimiedi nano bie rafue  
 tainiamona creyente.

*Jacobo* diga Pablo ñaia rafue

<sup>17</sup> Jerusalémo cai ria, creyentiaidi caina caimare  
 uaidotimaci. <sup>18</sup> Ie are Pablo, cai diga, Jacobo dine  
 jaide. Nana creyentiaina sedaraini nainomo jai  
 ofidimaci. <sup>19</sup> Uaidua mei, Pablo nagacinuaido Jusiñamui  
 judúuaiñedinomo finoca rafuena llote:

—Cue llofuiamona ailluena judúuaiñedino creyentiaina  
 jaidimaci —llote.

<sup>20</sup> Naie rafuena cacajano, Jusiñamuimo iobillacinona  
 fecadimaci. Iemei naimiemo llotimaci:

—Ama, ero, judúuaiimona ailluena comini jai creyen-  
 tiaina jaidimaci; ia nana naimaci Moisés micori llo-  
 gacinodo eo jaidimaci. <sup>21</sup> O finoca rafuena jai fididimaci.  
 Ona comini ñaiana jai fididicai. Jiaie nairai motomo ite  
 judúuaina Moisés micori llogacinona fainonocaillana llo-  
 fuetio. Naimaci uruiái abina deñenana llofuetio. Moisés  
 micori llogacinuaido jaiñellena llofuetio. <sup>22</sup> Ie jira ¿niese  
 nibaiticai? O rillana jai fididimaci. <sup>23</sup> Ie jira omo cai llua-  
 na fino. Cai ecimo cuatro iima jai ite. Nie isoide rafuena  
 Jusiñamuimo jai llotimaci. <sup>24</sup> Jusiñamui jofomo naimacina



uiño. Naimaci diga Moisés micorì llua isoi, o abì fino. Naie rafuena raise fuidollena, Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomoì. Ie mei nana cominì mare rafuena o finocana jaillana uiñoitimaci. Moisés micorì llogacinodo o nia jaillana uiñoitimaci. Iese omo lloiacadicaì. <sup>25</sup> Judúuaiñedino Moisés micorì llogacinodo jaillena lloñeiticaì. Naimacimona creyentiaina jaidinomo navui cueticai: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno” cueticai.

<sup>26</sup> Pablo “Jee” raillanona, nai cuatro iima diga ie are Moisés micorì llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamuimo nagamiai rana fecajaruina jiai llote. Siete digarui illanona, Moisés micorì llua isoi, naie rafuena fuidoiacadimaci.

### *Pablona gaitaja rafue*

<sup>27</sup> Naie siete iruillai fuiacanuillaimo Asiamona damierie judúuaidi bitimaci. Jusiñamui jofomo Pablona ciuano, cominì comeciaina feidocana uitimaci. Pablona gaitajanona, <sup>28</sup> cuiiriidimaci:

—Caimaci, caina cano. Bimie naga illanomo llofuiamona, cominina raise itatañede. Moisés micorì llogacinuaido jaiñede. Bifona raise sedañede. Judúuaiñedino bifomo atiano, bie mare jofo naimie jai jeare finode.

<sup>29</sup> Iese ite: Jerusalémo Trófimo diga Pablona ciodimaci. Trófimodi Efeso nairai imie. Judúuñedimie. Pablo naimiena Jusiñamui jofomo uillamo comecina facadimaci; iadedi uiñede. Judúuai cominimona judúuñedimie Jusiñamui jofomo jaillana maraiñede.

<sup>30</sup> Asiamona bitino cuiiriillamona, nana Jerusalémo ite cominì icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena

jino sonodimaci. Ie mei Jusiñamui jofona sedaraini nasena ibaidimaci. <sup>31</sup> Pablona meineiacania, soldaduai ie comandantedi nana comini ieillana fidide. <sup>32</sup> Iecon naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana fainonocaidimaci. <sup>33</sup> Comandante naimiemo iaireicaia, Pablona gaitade. Naimiena mena lleo diga maillena llote. Jicanote:

—¿Bu naimiedi? ¿Bue ñete?

<sup>34</sup> Nana iedinodi jiaiforie llotimaci. Ie jira naie rafuena naimie jaca uiñoñede. Ie muidona cuatelmo naimiena uillena llote.

<sup>35</sup> Cuartel tidabacuimo naimaci ria, comini jarire jailla jira, soldaduai Pablona uitimaci. <sup>36</sup> Ailluena comini racadimaci. Ocuioisite:

—¡Naimiena meine!

*Pablo ie abi* riidua llua rafue

<sup>37</sup> Cuartelmo jaiacania, Pablo comandantemo llote:

—O diga ñaiacadie.

Rajicaillamona, naimie uai ote:

—Griego uaido ñaitio— <sup>38</sup> Jiai llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

<sup>39</sup> Pablo uai ote:

—Naimieñedicue. Judío imiediecue. Ciliciamo ite Tarso railla nairaimona bitiecue. Naie nairai mamecidi are soride. Cominimo cue llollena, omo jicanoiacadiecue.

<sup>40</sup> —Jee —raite. Pablo tidabacui muidomo naidaide. Cominina lliicaitallena, ie onollina jaidide. Comini lliicailla mei, Pablo judíuai uaido naimacimo llote:

## 22

<sup>1</sup> —Caimaci, einamaci, cue abi riiduacinomo mai omoi cacarei.

<sup>2</sup> Naimie judíuai uaido lluaana naimaci cacajano, lliicaidimaci. Ie jira Pablo llote:

<sup>3</sup> —Judío imiedicue. Ciliciamo ite Tarso raila nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue. <sup>4</sup> Jesucristo ñnotinona jaie eo duere finodicue. Diga creyentiaina maianona, cárcelmo joneticue. fiñiaina duere finodicue. Riñoniaina jiai duere finodicue. <sup>5</sup> Jusiñamui diga nanoca ñairaima cuena uiñote. Nana omoi illaicomini cuena uiñotimaci. Creyentiaina duere finollena, naimacimona dajerie cartana jaie feiñoticue. Damascomo ite judíuaimo cuetimaci. Damascomo jaidicue, nainomo ite creyentiai maiano, Jerusalémo atianona, naimacina duere finollena.

*Pablodi* Jesúna ñnuana llua rafue  
(*Hch 9.1-19; 26.12-18*)

<sup>6</sup> 'Omoimo bie rafuena lloiticue. Jerusalémona jaidicue; iadedi Damascomo cue iaireicaia, jitoma naidai iacania, ieconi monamona damie cue abina eo quetiñote.

<sup>7</sup> Eniruemo ana uaidicue. Monamona damie cuemo lluaana cacadicue: “Saulo, Saulo, ¿bue ñellena cuena duere finodio?” <sup>8</sup> Jicanoticue: “¿Budío?” Monamona damie uai ote: “Nazaret ie Jesúsicue. Cuena duere finodio”.

<sup>9</sup> Cue diga itinodi cue quetiñua rana ciodimaci; iadedi cue diga ñaitimiena cacaiñedimaci. <sup>10</sup> Raiticue: “Nama, ¿bue ñeiticue?” Cai Nama cuena raite: “Naidadajana, Damascomo jai. Nainomo o finolle rafuena omo lloiticue”.

<sup>11</sup> 'Cuena eo quetiñua jira, cioiñedicue. Cue diga itino cue onollido llinocaida, Damascomo cuena uitimaci.

<sup>12</sup> Nainomo Ananías raillamiedi ite. Jusiñamuina eo ñnote. Moisés micori llogacinuaido eo jaisoide. Nainomo ite judíuaidi naimiena: “Mare” raitimaci. <sup>13</sup> Naimie

cuemo bite. Cuemo llote: “Saulo, ama, mai oni eroda”. Ieconi dane erodajanona, naimiena ciodicue. <sup>14</sup> Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uñollena, ie mare Jitona o cioillena, naimie uaina o cacareillena. <sup>15</sup> Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio. <sup>16</sup> Mai cue llwana ñno. Naidadajanona, o jeacino oni dotallena, Jusiñamuimo jica. Ie mei bautiza” raite.

*Judúuaiñedíno* Pablo jailla llua rafue

<sup>17</sup> Ie mei Jerusalémo abido cue billa mei, Jusiñamui jofomo Jusiñamuimo cue jñia, ñicairiticue isoidicue. <sup>18</sup> Cai Namana ciodicue. Cuemo llote: “Jerusalémona raire mai jai. Cominidi o cuena llwana feiñoñeitimaci”. <sup>19</sup> Uai oticue: “Nama, naga judúuai ofiracomo ona ñnotinona fauidicue. Cárcelmo naimacina joneuidicue. Nama, Jerusalémo itino iena uñnotimaci. <sup>20</sup> Esteban micori fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimiena meinetino ñiroina sedadicue”; <sup>21</sup> iadedi cue Nama cuemo llote: “Mai jai. Judúuaiñedíno ona are oretaiacadicue”.

*Comandante anamo Pablo illa rafue*

<sup>22</sup> Bie lloga ñinori comini Pablo llwana cacadimaci. Iemei cuiriidimaci:

—Bie isoide ñima illana benomo jítaiñedicaí. ¡Naimiena meine!

<sup>23</sup> Cuirillamona naimaci ñiroina jaidisite. Icirisiano eniruena jiai fadosite. <sup>24</sup> Judúuai uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:

—Naimiena cuartelmo uñño. Naimiena fano. Naimiemo ite rafuena caimo naimie llollena, naimiena duere fino.

<sup>25</sup> Naimiena maiano naimiena fallena, Pablodi nainomo ite capitámo jicanote:

—¿Juez nia lloñenia, romano nairai imiena fajana mare? Romano nairai imiedicue.

<sup>26</sup> Capitán iena cacajano, comandante dine jaide. Iena llote. Jicanote:

—¿Ñiese ñibaiticai? Bimie romanuai nairai imie.

<sup>27</sup> Iena cacajano, comandante bite. Pablomo jicanote:

—¿O Romano nairai imiedo?

Pablo uai ote:

—Jii.

<sup>28</sup> Comandante dinena raite:

—Romanuai nairai imiena cue jaillena, eo ibadicue.

Pablo uai ote:

—Romanuai nairai imiena jeicigacue.

<sup>29</sup> Ieconi naimiena duere finoacadino naimiemona raire oni jaidimaci. Pablo romanuai nairai imiena jira, naimiena jai ebena maia jira, comandante jiai jacinaite. Comecina ñibai facade: “Iese naimiemo cue finua jira, ie ibana ollena, cue illaimamo cuena jiai llogidoite”.

*Illai*comini motomo Pablo illa rafue

<sup>30</sup> Comandantedi judíuai Pablona llogiduana ua raise uiñoiacade. Ie jira ie are Pablona suiñollena llote. Jusiñamui diga nanoca ñairaini, nana judíuai illai comini diga, ofillena llote. Pablona atiano, naimaci motomo uillanona, naimiena naidanete.

## 23

<sup>1</sup> Ie abina riidollena, Pablo naie judíuai illai comini motomo ite. Naimacimo eruaillano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiemona cue comeci mare.

<sup>2</sup> Ananíadi Jusiñamui diga nanoca ñairaima. Pablo lluana naimie gaiñenamona, Pablo ecimo itinona Pablo fuenta farotate. <sup>3</sup> Pablo dinena naimiemo llote:

—Jusiñamui o fueña faroite. Mareuidimiena abina caitadio. Moisés micori llogacinuai muidona benomo itio, cuemo llolena; iadedi cue finoca rafuena raise o uiñoñoeno cue fue ebena farollena llotio.

<sup>4</sup> Nainomo itino raite:

—Jusiñamui diga nanoca ñairaimamo jeare ñaitio.

<sup>5</sup> Pablo uai ote:

—Moisés micori iena jaie cuiana uiñoticue. “Illaicomínina jeare ñaiñoeno” cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiemo iena lloñedicue.

<sup>6</sup> Comínimo Pablo eruailamona, saduceuai railla comíni nainomo illana ciode. Fariseuai railla comíni nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacínomo ocuiriticue. Ie jira bene cuena llogidoiacadomoi.

<sup>7</sup> Naimie iena lloia, naimaci comeciai daje isoi lloñedimaci. <sup>8</sup> Saduceuai comínidi fariseuai comíni isoi iñoñedimaci. “Fiodaillamona jilloñeíticai” saduceuai comíni raillana iinoside. “Jusiñamui jaienisaí iñede. Comíni joreñuái iñede” raillana iinoside; iadedi fariseuai comíni dinena nana naie rafue illana iñotimaci. <sup>9</sup> Ie jira eo failliñaidimaci. Fariseuai motomona jiaño naidadajanona, llote:

—Bimiemo jeacino iñede. Jusiñamui jaienici naimiemo nibai jaie llumona, bie rafue naimiemo ite.

<sup>10</sup> Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiema uillena llote.

<sup>11</sup> Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

*Pablona meineiacana rafue*

<sup>12</sup> Monaidemo, judúuaimona jiaino comeciaina facadimaci: “Pablona nia cai meineñenia guiñeiticai. Jiroñeiticai”. <sup>13</sup> Cuarenta baifemo ite comini iese comeciaina facadimaci. <sup>14</sup> Naimaci judúuai illaicomini dine jaillano, raitimaci:

—Dani comeciaina facadimaci: Pablona nia cai meineñenia, jaca buena guiñeiticai. <sup>15</sup> Omoi dine Pablona atillena, naimiemo eo raise jicanua isoi, comandantemo jicano. Pablo iairei bia, naimiema cai meinellena, ocuidoiticai.

<sup>16</sup> Pablo enaise naie rafuena fidiano, cuartelmo jaide, Pablomo lllollena. <sup>17</sup> Iena cacajano, Pablodi capitána uaidote. Raite:

—Bie coniruena comandante dine uiño. Naimie diga ñaiacade.

<sup>18</sup> Ie jira naimiema uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

<sup>19</sup> Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

<sup>20</sup> Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judúuai dani comeciaina facadimaci. <sup>21</sup> Naimaci jitailla isoi finoño. Cuarenta digamie baifemo naimiema reiduanos sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

<sup>22</sup> Comandante coniruena facaduano raite:  
—Jaca bumo cuemo o lluaña lloño.

*Félix* dine Pablo oretaja rafue

<sup>23</sup> Comandante mena capitána uaidote. Llote:

—Doscientos soldaduaina uaido, imaci raruiái finollena, Cesareamo navuida baife imaci jaillena. Setenta

caballuaido jaitino uaido. Doscientos ducirainina jiai uaido. <sup>24</sup> Jiaie caballona ati, naie emodomo rainadacaida Pablo jaillesa. Félix railla gobernador dine naimiena raise uifio —llote. <sup>25</sup> Cartana jiai cuete. Iese cuete: <sup>26</sup> “Félix, omo cueticue. Claudio Lisiasdicue. Cai mare gobernador dio. ¿Nigacino? Cue uai o dine oredicue. <sup>27</sup> Damie o dine oredicue. Judíuai naimiena meineiacana jira, soldaduai diga naimiena gaitaticue. Naimiena gaitataja mei, naimiedi romanuai nairai imienana fididicue. <sup>28</sup> Judíuai illaicomini dine naimiena uiticue, naimaci llogiduacinona raise cue uifollena. <sup>29</sup> Naimaci einamaci llogacinuai muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacañedicue. <sup>30</sup> Jiaino naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiai lloiticue. Naimaci naimiena omo lloitimaci” cuete.

<sup>31</sup> Comandante llua isoi, soldaduai naiona Pablona Antípatrismo uitimaci. <sup>32</sup> Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide. <sup>33</sup> Cesareamo railla nairaimo rillanona, gobernador mo cartana fecadimaci. Naimie dine Pablona jiai uitimaci. <sup>34</sup> Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

<sup>35</sup> Gobernador dinena raite:

—O llogidotino bia, o rafuena cacajiticue.

Soldaduaimo jiai llote:

—Omoi anamo Herodes railla illaima micori jofomo naimiena seda.



<sup>1</sup> Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiai bite. Naimiedi llogidoraima. Gobernadormo Pablona llogiduaibitimaci. <sup>2</sup> Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio. <sup>3</sup> Iobillamona, nana cai iena feñoticaí. <sup>4</sup> Ona iciacaiñedicue; iadedi o fue maria jira, cue lluomo dallu cacarei. <sup>5</sup> Bimiedi eo cai abina aruire finode. Nana eniruemo ite judíuaina uri itatañede. Naimiedi Jesús raillamie rafuedo jaidino illaima. <sup>6</sup> Jusiñamui jofona jeare naimie finoiacana jira, naimiena gaitadicaí. Moisés micori llogacinuaido naimiena duere finoacadicaí; <sup>7</sup> iadedi comandante Lisias ride. Caimona naimiena riire bairode. Naimiena cai llogidollena, o dine cai billena caimo llote. <sup>8</sup> Pablomo o jicanoioacania, naimiemona bie rafuena uiñoitio. Nana naimiena cai llogiduacinona uiñoitio.

<sup>9</sup> Judíuai illaicomini, Tértulo llua isoi, dacinodo llotimaci.

<sup>10</sup> Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloiticue. <sup>11</sup> Doce digarui illanona, Jerusalémo como birui ridicue. Iena uiñoiacadiosa jiaie cominimo jicano. Jusiñamuina sedallena, Jerusalémo iticue. <sup>12</sup> Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofiracuaimo uaina jiai uaitañedicue. Naisomo uaina jiai uaitañedicue. Cominina uri itatañenana lloñedicue. <sup>13</sup> Nie isoide rafuena cue finuana cioñedimaci. Ie jira cuena raise

llogidonidimaci; <sup>14</sup> iadedi jiaie rafuena lloiticue. Cai usumatiai Jusiñamuina sedadimaci. Naimiena jiai sedadicue. Nana Moisés llogacinuaina iinoticue. Nana Jusiñamuina lloraini micriai ciegafuiaina iinoticue. Bimacimona jiaie llogacinuaido jai jaidicue. Bimacimona uanaiñedicinodo jaidicue. <sup>15</sup> Fiodaillamona comini ico jilloillena iinoticue. Jusiñamuina iinotino jilloitimaci. Jusiñamuina iinoñedino jiai jilloitimaci. Beno itino iena jiai iinotimaci. <sup>16</sup> Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena. <sup>17</sup> Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajaibidicue. <sup>18</sup> Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue. <sup>19</sup> Naie facaise Asiamona jiaie judúuai bitimaci. Cuemo nicino ia, ¿bue ñellena naimaci bene biñedimaci, cuena llogidollena? <sup>20</sup> Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci. <sup>21</sup> Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

<sup>22</sup> Félixdi Jesús díbeimo itino rafuena raise uíñua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite. <sup>23</sup> Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiai naimie dine jaillena rairuiñede.

<sup>24</sup> Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua

mei, Pablo llofuiana cacadiiamaia. Jesúna iinuana cacadiiamaia. <sup>25</sup> Jeacino finoñellena, dama ie jitailla rafuena finoñellena, jairuido Jusiñamui riicaillafue anamo iñellena cacadiiamaia. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

<sup>26</sup> Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena.

<sup>27</sup> Mena años illa mei, Porcio Festodi Félix ifo meidote. Félixdi judúuaina iobitaacana jira, cárcelmo Pablona fainonocaide.

## 25

### *Festomo Pablo llua rafue*

<sup>1</sup> Naie provinciamo darui amani rilla mei, Cesareamona Jerusalémo Festo jaide. <sup>2</sup> Nainomo Jusiñamui diga nanoca ñairainidi, jiaie judúuai illaicomini diga, Festomo Pablona llogidotimaci. <sup>3</sup> Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci. <sup>4</sup> Festo uai ote:

—Pablo Cesareamo fiebiite. Raire nainomo abido jaiticue. <sup>5</sup> Omoi illaicominimona damierie cue diga jaitimaci, nicino naimiemo ia, naimiena llogidollena.

<sup>6</sup> Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote. <sup>7</sup> Pablo billa mei, Jerusalémona bite judúuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci. <sup>8</sup> Pablo uai ote:

—Judúuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

<sup>9</sup> Iena cacade; iadedi Festo judúuaina iobitaacana jira, Pablomo jicanote:

—¿Jerusalémo cue diga jaiacadio? Nainomo nana bie rafuena siadoiticue.

<sup>10</sup> Pablo uai ote:

—Llogidoracomo jai iticue. Cai nanoca illaíma facaina cominimo llotio, naimacina duere finollena. Benomo cue lolle. Judúuaimo jaca buena finoñedicue. Iena raise uiñotio. <sup>11</sup> Romanuai railla nairai illaicomini llogacinona cue inoñenia, damamei jearede rafuena cue finoa, cue fiodaillemo jaca ocuridicue; iadedi cuemo nicino iñenia, cuena meinellena bu cuena judúuaimo fecañeite. Cue rafue naimie siadollena, Romamo cai nanoca illaíma dine jaiacadicue.

<sup>12</sup> Ie ecimo ite canoraini diga Festo ñaia mei, Festo raite:

—Cai nanoca illaíma dine o jaiacana jira, nainomo jaitio.

### *Agripamo Pablo llua rafue*

<sup>13</sup> Diga irui illa mei, Agripadi Festo dine, ie miriño Berenice diga, Cesareamo bitiaímaiaí. Agripadi naie enirue illaíma. <sup>14</sup> Diga irui nainomo itiaímaiaí. Naimiemo Festodi Pablo ie rafuena llote:

—Félix Pablona cárcelmo bene fainonocaide. <sup>15</sup> Jerusalémo navui cue ia, Jusiñamui diga nanoca ñairaimadi, judúuai einamaci diga, naimiena llogidote. Naimiena duere finollena cuemo jicanotimaci. <sup>16</sup> Naimaci uai oticue: “Cai Romanos cominidi llogidogamiena jamai tainomo duere finoñedicai; iadedi llogidogamiedi ie llogidotino uai nano cacareiticaí. Ie mei ie abi riidollicinomo jiai cacareiticaí”.

<sup>17</sup> Ie jira naimaci cue dine benomo navui bia, ie are cominimo cue llouillanomo raidicue. Pablona cue dine uaidoticue. <sup>18</sup> Naimiena llogidotinodi lloia, naimiena marañede finoca rafue cue facaja isoi, llogidoñedimaci.

<sup>19</sup> Dani naimaci iinuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. <sup>20</sup> Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”; <sup>21</sup> iadedi Pablo nainomo jaiacaiñede. Cai nanoca illaïma dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaïma dine naimiena cue nia oretañenia.

<sup>22</sup> Agripadi Festomo llote:

—Naimie ñaïana cacaacadicue.

Festo uai ote:

—Ico are naimie ñaïana cacareitio.

<sup>23</sup> Ie jira ie are Agripa, iaïmaïa Berenice diga, gobernador ofiracomo bitiaïmaïa. Finobillano ebire bitiaïmaïa. Soldaduai imaci illaïcomini jiaï bitimaci. Naie nairaïmo ite nanoca comini jiaï bitimaci. Ofilla mei, Festo Pablona atillena llote. <sup>24</sup> Festo llote:

—Agripa, nana beno itino, bimiena ciodomoi. Jerusalémo ailluena judíuai naimiena llogidotimaci. Bene cue dine jiaï bitimaci. Naimie meiniana eo jitaïdimaci; <sup>25</sup> iadedi naimiemo nicinodi iñenana jai uiñoticue. Naimiena meinellena cue llollena, nicinodi naimiemo iñede. Augusto dine naimie jaillena naimie jicanua jira, naimiena oretaiticue. <sup>26</sup> Nicinodi nia iñede, cai illaïmamo cue cuellena. Ie muidona omoi dine naimiena jai atidicue. Agripa, naimie ñaïamo raise cacarei. Naimiemo cai jicanua mei, nibai nicino naimiemo illana uiñoiticaï. Iemona Augustomo cueiticaï. <sup>27</sup> Augusto dine llavecamië cue oretaïa, naimiemo nicino iñenia, cuemona maraiñede.

## 26

*Pablo ie abina dane riidua rafue*

<sup>1</sup> Naie facaise Agripa Pablomo llote:

—Mai llono. O abi riiduacinona cacaacadieue.

Pablo: “Jii” raillanona, ie onolli a ñuitade. Raite:

<sup>2</sup> —Agripa, bene o illa jira, cuemona mare. Cue fue bail-lafuedo o uicomo cue abina riidoiticue. Judúuai cominidi diga rafuena cuena llogidotimaci. <sup>3</sup> Nana cai judúuai rafuena raise uiñotio. Nana cai einamaci rafuena jiai uiñotio. Cuemo raise cacarei. <sup>4</sup> Jerusalémo naimaci motomo cue illa jira, diga judúuai cue coniruenamona cuena uiñotimaci. <sup>5</sup> Cuenamaimaci lloiacania, fariseo imiëna cue illana are uiñotimaci. Jiaie comini baifemo fariseuaidi cai einamaci llogacinuaina iñnotimaci. <sup>6</sup> Jusiñamuidi cai usumatiai micoriaimo fiodaillamona comini ico jilloillena jaie llote. Ie suillemo jai ocuridieue. Ie jira llogidoracomo birui jai itieue. <sup>7</sup> Nagarui Jusiñamuina naimaci eo sedajamona, cai doce nairaidi naie llogacino suillemo jiai nia ocuridimaci. Ore illaïma, bie ocurillacino muidona judúuai illaicomini cuena llogidotimaci.

<sup>8</sup> ¿Bue ñellena Jusiñamuidi comini fiodaillamona jil-lotajana iñnoiacaïñedomoi? <sup>9</sup> Jaie ie isoidieue. Nazaret ie Jesúna iñnotinona diga jearede rafuena jaie finoacadieue. <sup>10</sup> Jerusalémo iena finodieue. Cárcelmo ailluena Jesúna iñnotinona joneticue. Jusiñamui diga nanoca ñairaini uaido iena finodieue. Naimacina meinelle cai illaicomini raia: “Jee” raisoidieue. <sup>11</sup> Diga judúuai ofiracomo, diga icaiño, naimacina duere finodieue. Naimaci Jesúna jeare ñaiana jitaidieue. Naimaci diga cue eo icirilla jira, jiaie eniruemo ite nairaimo jiai jaidieue, naimacina duere finollena.

*Pablodi* Jesúna iñnuana llua rafue

(*Hch 9.1-19; 22.6-16*)

<sup>12</sup> Ie jira Damascomo jaidieue. Jusiñamui diga nanoca ñairaini uaido jaidieue. <sup>13</sup> Ore illaïma, jitoma naidai ia,

monamona quetiñotena ciodicue. Naidi jitoma baifemo quetiñote. Cue abina quetiñote. Cue diga itino abina jiai quetiñote. <sup>14</sup> Eniruemo cue ana uaiá, damie lluaana cacadicue. Judúuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadío”. <sup>15</sup> Uai oticue: “¿Budiota?” Cai Nama cuemo llote: “Jesúdicue. Cuena duere finodio. <sup>16</sup> Mai a naidacai. Cue rafuena o llofuellena ona fetodicue. O birui ciua rafuena lloitio. Ona cue uiñotalle rafuena jiai lloitio. <sup>17</sup> Naimaci ona duere finoia, omoi cominimona ona jillotaiticue. Judúuaiñedinomona ona jiai jillotaiticue; iadedi judúuaiñedino dine ona oretaiticue, <sup>18</sup> naimaci comeciái tainomo iñellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiñedinomo jai itimaci isoidimaci. Jusiñamuina uiñuamona, useredino iitimaci isoidimaci. Iemei Jusiñamui naimaci jeacinona dotajite. Cuena naimaci iñuamona, nana cuena iñotino diga cue illano ico jaca iitimaci”.

<sup>19</sup> Ore Agripa, monamona cue cacaja rafuena iñoticue. Jesúdi Jusiñamui Jitona iñoticue. <sup>20</sup> Damascomo itinomo iena nano lloticue. Ie mei Jerusalémo itinomo iena jiai lloticue. Diga Judeamo itinomo iena jiai lloticue. Judúuaiñedinomo iena jiai lloticue. Lloticue: “Omoi comeciáimo iticinona meido, Jusiñamui díbeimo omoi illena. Omoi comeciáimo iticinona omoi meidua mei, mare rafuena finocana jai”. <sup>21</sup> Ie jira judúuai illaicomini Jusiñamui jofomo cuena gaitadimaci. Cuena meineiacadimaci; <sup>22</sup> iadedi Jusiñamui cuena canode. Ie jira birui bene iticue. Illaicomini beno nia lloticue. Illaicominiñedinomo jiai nia lloticue. Dama Jusiñamui facaina lloraini micoriai

ico suille cuegafuena birui lloticue. Dama Moisés micori ico suite cuegafuena jiai birui lloticue. Jiaie rafuena lloñedicue. <sup>23</sup> Jaiie cuetimaci: “Cristo llegi cajite. Fiodaillamona jilloite. Naimiedi nano dofoconi jilloitimie. Iemona cai judúuai comini jeacinomona jilloil-lena uiñoitimaci. Iemona judúuaiñedino jeacinomona jilloillena uiñoitimaci”. Ie jira bie rafuena llocana jaidicue.

*Crezentena Agripa jaillena Pablo jitailla rafue*

<sup>24</sup> Iese Pablodi abi riiduano, Festo riire llote:

—Pablo, odi uairico isoidio, eo comecina o facaja jira.

<sup>25</sup> Pablo uai ote:

—Uairicoñedicue. Festo, odi cue illaimadio. Cue llucacino di uanaicino. Ebena ñai-ñaiacaiñedicue. <sup>26</sup> Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede. <sup>27</sup> Ore Agripa ¿Jusiñamui lloraini cuegafuiaina iñnotio? omo jicanoticue. Iena o iñnuana jai uiñoticue.

<sup>28</sup> Agripa dinena uai ote:

—Dallu o ñaiamona, cuena crezentena nibai itataiacadio.

<sup>29</sup> Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedi omoi bie lleo diga maiana jitañedicue.

<sup>30</sup> Iemona Agripa naidacaide, Festo diga, Berenice diga. Nana raidino jiai naidacaidimaci. <sup>31</sup> Jino jaillano, Pablo joreña siadotimaci:

—Bimie jaca buena finoñede, naimiena cai meiniana llollena. Buena finoñede, cárcelmo illena.

<sup>32</sup> Agripa Festomo llote:

—Naimie cai nanoca illaima dine jaillana jicanoñedena, niadedi naimie jino marena oreca.



## 27

*Romamo Pablo jailla rafue*

<sup>1</sup> Italiamo Augusto dine Pablo oretajana Festo Ilua mei, Pablona jiaie llavecano diga capitámo fecade. Naie capitádi Julio. Augustona mameciredede batalómo jainaiaide. <sup>2</sup> Adramitiomona bite botemo jaidicai. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai. <sup>3</sup> Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaille rana ote. <sup>4</sup> Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai. <sup>5</sup> Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia. <sup>6</sup> Naie bote Roma dine jaiñena jira, capitádi jiaie botena jenode. Capitádi Alejandríamona bite botena baite. Naie bote Italiamo jaiacade. Ie jira naie botemo cai jonecaida, caina uite. <sup>7</sup> Diga irui fecuise sefuire jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai. <sup>8</sup> Uiasi iaireise iese sefuicana jaillanona, Maregoebe railla illanomo ridicai. Lasea railla nairai jiai ianori ite.

<sup>9</sup> Digarui cai faifilla jira, noci deisoilla facaise jai illa jira, jaillena eo jaciredede. Ie jira botemo maijidinomo Pablo llote:

<sup>10</sup> —Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruiaina nibai faifiticai. Botena jiai nibai faifiticai. Cai nibai jiai faifiticai —llote.

<sup>11</sup> Iese llote; iadedi naie bote piloto oni jaiacade. Naie bote nama jiai oni jaiacade. Capitán iaímaiai lluaana Pablo lluaana baífemo iinote. <sup>12</sup> Igobe maraiñena jira, rollime facaise illa jira, ailluena comini nainomona jaiacadimaci. “Fenice railla nairaimo niedi riiticaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaiide. <sup>13</sup> Beici dinena aifidi bia, “caí jitailla aifidi bite” raillanona, suiñodicai. Creta iaírei monaillai fuemo jaidicai. <sup>14</sup> Ie mei raire caí dine eo riire aifi bite. Naie aifi noci deisoilla dinena bite. <sup>15</sup> Botena oni uite. Botena atona eronenidicai. Ie muidona jamai ebena jaidicai. Aifidi caina iese uite. <sup>16</sup> Janorede uiasi fuemo aifi raise iñenanomo jaidicai. Nai uiasi mameci Clauda. Faifiñellena bote ie janorede nocae sefuire a aiñodicai. <sup>17</sup> A aiñua mei, rao diga botena ruica maiticai. Sirte railla conillie illanomo caí joodai raillano, velaiaina duiñodicai. Iemei aifi jamai uigacai. <sup>18</sup> Ie areruido aifi riire illa jira, cargana oni dotadicai. <sup>19</sup> Dane ie are bote ie raruiai, caí onolli diga, oni dotadicai. <sup>20</sup> Diga irui jitoma bainide. Diga irui ucuai jiai bainide. Aifi eo riire nia ite. Caí jillobiñellemo jai ocuirñedicai.

<sup>21</sup> Diga irui caí guiñena mei, Pablo naimacimo llote:

—Nabaiñiai, cue uaina navui iinotiomoídena, niadedi bie isoi sefuíñedicai. Cretamo caí fiebidicaina, bie isoi sefuíñedicai. <sup>22</sup> Omoi comeциаína ocuiño. Bie botedi faifite; iadedi caimona jaca buna faifiñeite. <sup>23</sup> Jaive naiona Jusiñamui jaienici cuemo bairede. Jusiñamuimo jainaiaidicue. Naimiena sedadicue. <sup>24</sup> Naie jaienici cuemo llote: “Pablo, jaciruiñeno. Romamo o nanoca illaíma dine iitio. Jusiñamui ona duenailla jira, nana o diga jaidino jilloitimaci”. <sup>25</sup> Ie jira omoi comeциаína ocuiño. Cuemo llua isoi, naimiedi bie rafuena suitate. Jusiñamui iena finuana iinoticue. <sup>26</sup> Nibaí uiasimo jutadaiticai.

<sup>27</sup> Catorce digarui naio illamona, Adria railla monail-laimo jamai cai jaia, naiona daferui facai marineruaidi: “Enirue iaire ite” raillanona comeaiaina facadimaci. <sup>28</sup> Ie jira ie afoedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede. <sup>29</sup> Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci. <sup>30</sup> Naie facaise marineruai botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

<sup>31</sup> Iena ciuano, Pablo capitámo llote. Soldaduaimo jiai llote:

—Botemo bimaci fiebiñeniadedi, jilloñeitomoi.

<sup>32</sup> Ie jira soldaduaidi nocae maia raona jaitadimaci. Jai dinomo nocaena faionocaidimaci. <sup>33</sup> Nia monaiñenia, Pablo nana caimo llote:

—Guiño. Catorce digarui illanona, jai guiñedomoi. <sup>34</sup> Ie jira guiño, omoi mairillesa. Ua faifiñeitomoi.

<sup>35</sup> Iese naimie raillanona, Jusiñamuimo iobillacinona fecade, nana comini illa uicomo. Llomeniconona tairuano, guite. <sup>36</sup> Nana naimaci comeiai ocuiñocaida, jiai guitimaci. <sup>37</sup> Botemo doscientos setenta y seis diese iticai. <sup>38</sup> Cai monillamona, fiebide trigona monaillaimo oni fadodicai, bote meenaiñellena.

<sup>39</sup> Ie oni monaidemo, erodatemo, naie eniruena uiñoñedicai. Igobemo conillici illana ciodicai. Nainomo jamai ebena sijiacadicai. <sup>40</sup> Ie jira lloelluna nainomo oni faionocaidicai. Datarabe maiana suiñodicai. Vela aifimo sebiñoticai. Monailalai fuemo enirue dine jai jaidicai.

<sup>41</sup> Iemei jaiciridifomo ridicai. Eniruemo jodate. Bote muido eniruemo jaiaire jodate. Eo baguamona jillaci taicosite. <sup>42</sup> Naimaci iamona jillobi raillano, soldaduai llavecana meineiacadimaci. <sup>43</sup> Pablona jillotaiacana jira, capitán iena rairuide. Llote:

—Nano iana uiñotino diese monaillaimo ana daia. Eniruemo jai. <sup>44</sup> Jiaino bote ie rabicido juicaida icana jai. Jiaino bote ie raruiaido juicaida icana jai. —Iese eniruemo nana marena ridicai.

## 28

*Maltamo naimaci illa rafue*

<sup>1</sup> Jai cai jillua mei, Malta railla uiasimo cai illana uiñoticaí. <sup>2</sup> Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. <sup>3</sup> Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide. <sup>4</sup> Jaio naimie onollido lliillana Malta comini ciuano, coniniri ñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

<sup>5</sup> Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. <sup>6</sup> Comeciaina facadimaci: “Naimie onollí raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi ñibai Jusiñamui.

<sup>7</sup> Naie illanomona uiasi illaíma enirue iaíre ite. Naimie mamecidi Publio. Caina marena feiñote. Darui amani ie jofomo caina marena itatate. <sup>8</sup> Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onollí naimiemo joniano, naimiena jillotate. <sup>9</sup> Bie rafue suilla jira, naimie dine nana uiasimo ite duidino bi-bidimaci. Naimacina jillotate. <sup>10</sup> Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

*Romamo Pablo rilla rafue*

<sup>11</sup> Daje amani fivui illa mei, Alejandríamona bite botedo jaidicai. Naie uiasimo nana rollime facaiseconi

naie bote ite. Mena jusiñamui iaímaiai joreño bote muidomo ite. Damie Cástorna mameciredede. Jiáimie Póluxna mameciredede. <sup>12</sup> Naie botedo oni cai jailanona, Siracusamo sijídicaí. Darui amani nainomo iticaí. <sup>13</sup> Nainomona jaillano Regiomo sijídicaí. Darui illa mei, aifi beici dínena billa jira, ie areruido Puteolimo ridicaí. <sup>14</sup> Sijía mei, nainomo creyentiaina baiticaí. Naimaci díga siete dígarui cai illana jitaidimaci. Ie mei Roma díne jaidicaí. <sup>15</sup> Romamo nia cai riñenia, nainomo ite creyentiaí cai billana fididimaci. Cai díne bitimaci. Foro de Apio railla nairaimo damierie bitimaci. Jiáino Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jiaí ocuiñote. Cai díga Romamo jaidimaci. <sup>16</sup> Romamo cai ria, capitán llavecana ie illaimamo fecade. Cárcelmo Pablona naie illaima oreñede; iadedi Pablo ie íbauiga jofomo eneno oni orede. Aisii raillano, daje soldado nainomo naimièna sedade.

### *Romamo Pablo llofuia rafue*

<sup>17</sup> Darui amani illa mei, Pablo Romamo ite nanoca judíuaina uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamaci llogacinuaina jaca ínoticue; <sup>18</sup> iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo íñena jira; <sup>19</sup> iadedi judíuai: “Dama ite” railla jira, cai nanoca illaima díne jaillena jicanoticue; iadedi cue nairai díga jaca iciriñedicue. <sup>20</sup> Omoi díga ñaillena, omoína cioacadícue. Fiodaillamona íco comini jillollena cue llofuecabilla jira, bie lloeo díga maigacue.

<sup>21</sup> Uai otimaci:

—Judeamona jiaino ona cuega cartana jaca feiñoñedicaí. Caimo o rafuena llollena, jaca buna biñede. Bene jaca bu ona jeare ñaiñede. <sup>22</sup> Ie jira omona naie rafuena cacaacadicaí. Naga illanomo comini o llofuiana uaitajana uiñoticaí. Creyentiaina jeare ñaitimaci. Iena fididicaí. Ie jira caimo iena raise lloño.

<sup>23</sup> Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui ñibeimo naimaci comeciái iuaina meiduana llofuate. Moisés micori llogacinuaimona, Jusiñamui facaina lloraini micoriai cuegafuaimona, Jesúsna llofuate. <sup>24</sup> Jiaino naimie llofuiana iñnotimaci. Jiaino iñoñedimaci. <sup>25</sup> Nana naimaci comeciaina daje isoi lloñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorina cai usumatiaimo raise llotatate. Omoi usumatiai micoriai illa isoi nia itomoi. Isaías micoridi omoína jai cuega rafue jai suide. Naimie micori cuete:

<sup>26</sup> Jusiñamui llote: “Bie comini dine mai jai.

Lloño: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

<sup>27</sup> Omoi comeciái jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisínidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue ñibeimo iacaiñedomoi, omoína cue jilloitai railanona’ ”.

<sup>28</sup> Jusiñamui rafuena omoi iñoñena muidona, judíuaiñedinodi Jusiñamui naimacina jilloitaiacanana jai fididimaci. Naimaci iena cacareitimaci.

<sup>29</sup> Iese naimie llua mei, judíuaidi coniniri siadocana abido jaidimaci.

<sup>30</sup> Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote. <sup>31</sup> Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meid-uana llofuate. Marefodo llofuate. Naimiedi cai Nama Jesucristo rafuena llofuate. Jaca budi naimie llofuiana rairuiñede. Teofilo, jaca digacino omo jai lloticue. Mai. Lucadicue.

**Jusiñamui uai: Jusiñamui jito rafue illa rabenico**  
**New Testament in Huitoto, Murui (PE:huu:Huitoto, Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---



PDF generated using Haiola and XeLaTeX on 14 Jun 2022 from source files dated 28 May 2022

145a1f66-dca1-5de3-9c00-4e533605e488